



牧隱文稿

大五

~ 20  
2464  
5 止





牧隱文集卷之十六



重大匡清城君韓謚平簡公墓誌銘并序

上之十四年平簡公始拜密直副使其冬將賀象歲  
正京師宰臣入對令丞相鑑甲殿庭號令天下朝覲  
會同非他日比臣等嘗難其使謹昧死請即日有旨  
非韓某不可召公入面諭曰丁酉之賀 聖節也  
去無難也來無憂言予惟汝嘉迄今不忘汝往敬哉  
公再拜謝臣不肖備位樞府無他材能以效萬一敢  
使事之避使還果稱旨未幾封君就第猶冀其起之  
不久也嗚呼遽至於斯乎公姓韓氏世為清州人遠



4m  
2406  
止



祖蘭有功國初號三韓功臣其後最盛者曰康在元  
王時掌試成均相 忠烈王兩知貢舉中贊致仕謚  
文惠文惠生諫議大夫謝奇諫議生上黨府院君渥  
謚思肅嘗以奇謀脫 忠肅王明夷之中相 永陵  
拜為冢宰配食 大廟思肅娶同知密直典理判書  
元卿之女生子五人元厚卒官知都食議司事仲禮  
方信皆故堂文學公於次為第二兄友弟恭時入幕  
之學浮屠法者曰覺星亦曾談韻釋也公諱公義字  
宜之享年五十九初以門蔭錄南部事蚤為 永陵  
所知超授護軍累轉大護軍三司右尹安恬忤時輩

出牧全州有惠政 明陵時歷小府衛尉繕工三判  
事 聽陵擢代言遷位之日奏食白馬山下私謂人  
曰君臣俱有終始 今上以為忠久欲試其能官制  
行拜散騎常侍未久改戶部尚書拜歲遷刑部訟田  
訟不法群口迭咻隨事裁遣人無怨言其在朝堂吏  
把成案請署遇不可反覆以示其意然後署蓋非偶  
然者夫人慶氏右代言斯為之女贊成事鄭璠之外  
孫為婦為母以順以則男三人曰備好古而文由及  
第歷館職全為軍簿判書次遷亦及第有名開城判  
官次齊別將學舉素女三人皆先設宗簿令金士謙



三司右尹李彰路軍簿判書廉與邦其婿也孫男四  
入祐復別將次善復餘幼女五人外孫男金禰權務  
女二人將以十一月甲申葬臨津縣瑞谷南麓脩興  
邦來乞銘公之子婿予友也銘友之父何忍辭諸公  
慈祥勤儉動循禮法藎而不發經濟之具一日不獲  
專乎國故天也雖然身無擇行教子有成歿得羨謚  
是足以傳諸其後矣亦可以無憾也夫銘曰  
文惠之孫思庸之子振振弟兄克世其美公事 聰  
陵既有終始不問其宗其節可使再觀大庭還必稱  
旨衆曰時哉公則逝矣維時聽之莫感尚此而止於

斯孰徵其理乎庸詩之以訊來世

鷄林府院君謚文忠李公墓誌銘

至正二十七年歲在丁未秋七月 推誠亮節同

德協兼贊化功臣辟上三韓三重大臣鷄林府院君

領藝文春秋館事益齋先生李公以病卒于第年八

十一大常謚文忠公十月 有司具儀衛葬于牛

峯縣旆李村先塋丙辰冬十月 配享 玄陵廟庭

公諱齊賢字仲思父姓李氏新羅始祖赫居世有佐

命大臣曰李謁平其後蘇判居明生兵部令金現兵

部生三韓功臣大守金書新羅王金溥既納土八朝



尚 大祖女樂浪公主生女以妻金書生潤弘潤弘  
生承訓承訓生周復周復生侁侁生修連修連生寵  
暹寵暹生春貞春貞生玄福玄福生宣用宣用生外  
高升高升文林郎尚衣直長同正諱得堅尚衣生贈  
左僕射諱翽僕射生檢校故丞諱文定諱瑱娶戴陵  
直朴仁育之女辰韓國大夫人以至元丁亥十二月  
庚辰生公公自幼英然如成人既知為文已有作者  
氣大德辛丑公年十五鄭常待僖試成均舉者負其  
能相頡頏聞公所作消縮莫敢爭先公果為魁是歲  
菊齋權公溥悅軒趙公簡試禮闈公又中丙科權公

以其子妻之公曰此小技耳不足以大畜吾德討論  
墳典渣貫精研折衷以至當文定公大喜曰天其或  
者益大吾門乎癸卯權務奉先庠判官延慶宮錄事  
戊申選入藝文春秋館館中人推讓不敢論文其冬  
遷齊安府直諱己酉權司憲糾正庚戌遷選府散郎  
辛亥再轉典校寺丞三司判官所居稱職皇慶壬子  
選為西海道按察使有古持斧風墜成均樂正冬提  
舉豐儲倉事癸丑副令內府豐儲監斗斛內府校錙  
銖尺寸公為之無難色人曰李公可謂不器君子矣  
忠宣王佐 仁宗定內難迎立 武宗故於兩朝寵



遇無對遂請傳國于 忠肅以六尉留京師卽構萬  
卷堂考究以自娛因曰京師文學之士皆天下之選  
吾府中未有其人是吾羞也召至都實延祐甲寅正  
月也姚牧菴閻子靜元復初趙子昂咸游 王門公  
周旋其間學益進諸公稱歎不置乙卯遷選部議郎  
秋拜成均祭酒仍兼議郎丙辰奉使西蜀所至題詠  
膾炙人口是歲判典校寺事丁巳拜選部典書己未  
王降香江南樓臺風物遇興遣懷每從容曰此間不  
可無李生也庚申知密直司事賜端誠翊贊功臣之  
號知貢舉時稱得三公平蓋三十四文忠展韓外舅

始三座主皆無恙公舉觴稱壽一世歡之是年奏授  
高麗王府斷事官至治壬戌冬還京師未至 忠宣  
王被謫出西蕃明年公往謁謳吟道中忠憤藹然奏  
定甲子加匡靖大夫密直司事乙丑改賜功臣号曰  
推誠亮節再轉僉議評理故堂文學丙寅移三司使  
天曆庚午忠惠王權國復為故堂文學未幾罷後至  
元丙子以三重大匡封金海君領藝文館事己卯春  
二月 忠肅王薨其秋政丞曹頤賚百官屯兵永  
安宮宣言逐去君側惡小而陰為藩王地 忠惠王  
率精騎擊殺之而其黨之在都者甚衆必欲抵



王罪人心疑危禍且不測公憤不顧曰吾知吾君之子而已從之如京師代古以筆重得辨折功在一等既還群小益煽公屏迹不出著櫟翁稗說至正甲子冬忠穆王即位進府院君領孝思觀書筵以公為師丙戌修 忠烈王實錄戊子判三司事辛卯冬玄陵即位未至國拜公右政丞權署征東省事數月國空虛公措置得宜人賴以安壬辰賜推誠亮節同德勛義贊化功臣之號元從功臣趙日新忌公居其上公知之三上表固辭其冬十月日新聚群不逞夜入宮害所忌縱兵誅殺公以辭位得免日新伏誅起

公為右政丞癸巳正月辭五月以府院君知貢舉甲午十二月復為右政丞明年又辭公年七十封金海侯十二月為門下侍中丁酉五月乞以本職致仕從之國制封君致仕須祿有差既老而猶受厚祿於義不安故有是請朝論以為本職致仕非所以敬大臣也壬寅復封鷄林府院君公自十五登科名蓋一世立朝以來專奉文書歷外制於藝文春秋館由屬官至兩府封君未嘗去職唯 忠定三年不與焉以公嘗奉表請立 玄陵故也公天資厚重輔以學問高明正大故其發於議論措諸事業者燁然可觀也初



公讀史筆削大義必法春秋至則天紀曰那將周餘  
今續我唐日月後得朱子綱目自驗其識之正人有  
片善稱譽惟恐不聞先輩遺事雖細以為難及平生  
未嘗疾言遽色有及於穢語對客置酒商榷古今齋  
壘不倦崔拙翁歎曰士別三日刮目相待吾於益齋  
見之矣公務遵舊法不喜更張嘗曰吾志豈不如古  
人但吾才不及今人耳公之孫連姻奇氏公忌其戚  
備及其拜平章 玄陵勅兩制賦詩以賀且命公叙  
其事公辭不為自号益齋幸脫之敗 玄陵曰益齋  
先見之明不可及也嘗言此非端人今果驗公自以

備輩不敢斥名必稱益齋及為宰相人無貴賤皆稱  
益齋其見重於世如此公所著文集若干卷行于世  
公凡三娶吉昌國夫人權氏生二男三女長男曰瑞  
種奉常大夫宗簿副令次曰達尊奉常大夫典理摠  
郎寶文閣直提學知製教長女適正順大夫判司僕  
寺事任德壽次適中正大夫典農正李係孫次適銀  
青光祿大夫簽書樞密院事翰林院大學士金希祖  
封義和宅主壽春國夫人朴氏宣授西京寺處萬戶  
府副萬戶中顯大夫司僕正諱居實之女生一男三  
女男曰彰路奉翊大夫開城尹長女適正順大夫判



典農寺事朴東生次適奉順大夫判典校寺事宋懋  
次惠妃今為尼瑞原郡夫人徐氏通直郎知瑞州事  
諱仲麟之女生二女長適中正大夫三司右尹金南  
雨次適奉善大夫典醫副正李有芳側室生二女長  
適中郎將林富陽次幼宗簿娶密直使兼監察大夫  
洪侑之女生一男二女男曰寶林匡靖大夫政堂文  
學商議會議部監事准賢館大提學上護軍長女適  
通憲大夫判衛尉寺事趙茂次適中顯大夫順興府  
使李元摘又娶撫校中郎將金杪在之女生一男曰  
乃猷曹溪宗廣度寺住持愬郎娶上黨君白頤正之

女生三男一女長曰德林朝奉郎驪興郡事次曰壽  
林奉翊大夫同知密直司事仕元朝為翰林學士資  
善大夫以故贈公太常卿具勲階爵次曰學林中顯  
大夫小府尹女適奉翊大夫開城尹光祿大夫同知  
樞密院事奇仁傑開城娶重大匡清城君謚平簡諱  
公義之女生韓氏生一女適春秋檢閱元序繼室正順  
大夫判典客寺事金昂之女生二男一女長曰蟠剛  
定都監判官次曰家慶仙店錄事女幼司僕生二男  
四女長男曰純義奉善大夫軍器少尹次曰純禮中  
郎將長女適通直郎起居郎知製教中俸次適中正



大夫親衛軍大護軍朴永忠次適奉善大夫小府尹  
黃侃次適中郎將金鏞典農正生二男一女長曰隲  
郎將次曰亮中郎將女適通憲大夫判繕工寺事安  
翊判典農生三男一女長曰經奉善大夫軍器少尹  
次繡別將次殊文別將女幼典校生一男幼左尹生  
二男長曰上佐次曰廣大女皆幼曾孫男女若干人  
趙衛尉生二男二女長曰從善中郎將次遷善權務  
女皆幼李頌興生一男二女男曰有喜崇恩殿直女  
皆幼驪興生二男二女長男曰伸承奉郎供造署令  
次曰密長女適正順大夫判衛尉寺事李承源次適

宣德郎通禮門祿使郭濟德直生二男二女長曰  
崇義次崇道典客錄事女皆幼小府生一男二女男  
幼長女適司憲持平金萬具次幼奇開城生一男曰  
慎純義生一女幼純禮生一男曰滋一女幼申渾生  
一男二女男曰浩大殿旨諭中郎將長女適郎將黃  
允奇次幼大護軍生三男三女長曰龍壽別將餘皆  
幼黃小府生一男二女男曰藥奴餘皆幼隲生一男  
一女男曰孝奴女幼亮生三男一女長曰伯恭次伯  
謙餘幼銘曰

天地儲精公迺挺生奎璧耀苞公迺發揚名溢域中



身居海東道德之首文章之宗北斗泰山昌黎之韓  
光風霽月春陵茂叔四秉國鈞年踰八旬麟鳳其瑞  
著龜其神功在社稷澤流生民閭宮外配哀榮無對  
唯用子孫忠孝是遵勿謂無知公在九原

彥陽郡夫人金氏墓誌銘并序

夫人姓金氏彥陽郡人高祖諱統殲大師門下侍郎  
謚威烈曾祖諱佺大傅門下侍郎謚翊戴祖諱聯都  
僉議叅理謚文慎父諱倫輸誠守義協贊輔理功臣  
辭上二韓三重大匡彥陽府院君諱貞烈母卞韓國  
大夫人崔氏大儒中書令文憲公諱冲十三世孫副

知密直司事諱瑞之女也年十三歸閔氏盡婦職性  
嚴教子弟必以禮宗族至今稱之生一女適判軍器  
寺事金昂新羅王諱溥十八世孫也金氏子男曰齊  
閔曰齊曰顯曰九德女適密直副使金士安前開城尹  
李彰路前宗簿令崔有慶前郎將許顯前典客副令  
許誼郎將兼博士李存斯門下注書金瞻次未適齊  
閔改九容遺其子顯威衛錄事明善以狀徵銘且曰  
吾外祖及菴公性真率不立崖岸日以詩酒自適不  
問家人生產而惟夫人之是聽夫人議酒食以娛外  
祖之心亦惟日不足也教女孫必曰事夫之禮自始



至老唯守一敬而已至於衣食必精必潔惟其時可  
矣故當時語曰閔公之放曠夫人理於內故也彥陽  
伯敬直雖長於夫人亦憚夫人不敢少慢簽書密直  
希祖與諸弟皆母事之歲己亥及養公既歿甫畢  
避辛丑紅賊下嶺南還居驪興嘗自嘆曰吾孫齊顏  
不得其死吾何顏復入京邑乎其剛烈有父風云歲  
甲寅秋九月十九日 以病卒年七十三歲也以其  
年十二月十五日葬于郡南鈴山之西及養之葬于  
嘗以詩相其挽夫人之墓銘其可辭曰然銘曰  
驪江之西鈴山之陽及養之室金氏攸藏威烈之風

振于貞烈閨門肅然有文有節惟爾子孫惟心之存  
無墜婦則以慰九原

金純夫父母墓表

嗚呼人物之生久矣富貴在天死生有命孰主張是  
而變化之無窮耶抑著茫無端適然而然耶吾同年  
金純夫棄官養父母于歙谷之村有年矣一日叩吾  
門與吾語予觀其貌甚瘠焉疑其病也將以問其病  
之所起而未敢發君則愀然改容曰吾父在殯未卜  
葬地卜日又未得言是以來京將以廣求博訪勿之  
有悔焉耳不然雷雨方作山谷澗溪行路之苦蓋甚



吾何由有此行哉予聞之悲即復之曰仁哉純夫也  
送死大事也不可苟也必誠必信禮已言之矣後世  
術家山水日月之說雖非聖人之法然亦入子之所  
不可廢也吾身之吉凶子孫之福禍吾父母之老所  
當慮雖百世不忘也入子而能體其父母之心者宅  
兆之上實謹之又謹者也純夫又曰吾父年九十二  
歲吾母八十七歲皆康強無疾同處而未嘗一日之  
相離也居家苟有樂以無憂平生不妄語自吾成童  
父母絕愛之未嘗役以鄙事而爾汝之嘗曰吾兒非  
常人也及就學從之遠游師友講習俾克有立自吾

登科拜六曹官存問是道為官於隣親下車具酒食  
壽吾父母吾父母欣然樂於心雖古所謂養親之至  
無以過之此吾之心所以安焉而無少欠且無他求  
者也予曰純夫養生既無憾矣而冒暑雨走不憚勞  
圖所以送終者又如此非至孝而能然乎夫事神治  
人天下之大政也而仁孝誠敬為之本純夫之本立  
矣道之生也孰禦哉予是以不俟其請而為之表金  
氏出聞慶縣曾祖曰某官祖曰某官父曰某官  
官母某氏曾祖曰某祖曰某考曰某年某月某日  
葬某原嗚呼金氏之先潛德之發吾純夫足以當之



矣而純夫以長身見稱于大明掃紳之列專對而還  
國人稱道之金氏之福天或益昌之乎是為表

重大匡玄福君權公墓誌銘并序

權氏始於金幸新羅大姓也守福州 太祖既正位  
攻新羅行至福幸能知天命所歸舉邑以降 太祖  
喜曰幸也可謂有權矣因賜姓曰權後世多聞人文  
清公諱胆有重望會議贊成事菊齋先生諱溥位冢  
宰文章道德冠一時松齋先生諱準封吉昌府院君  
置僚佐謙恭守節義善居室一國傾向二世知貢舉  
門生多達官是以散富貴慕禮法者皆歸權氏 毅

陵納公之女曰壽妃 永陵納公之姊之女洪氏曰  
和妃重權氏故也公雖以門蔭致身華顯心甚不樂  
唯重節義世以此之公諱廉字士廉松齋娶密直  
使吳公諱仁永之女以大德壬寅冬十月己巳生公  
年十歲補舍慶殿錄事延祐甲寅遷別將明年選充  
寶馬陪行首未幾進郎將歲丁巳如燕京戊午拜三  
司副使階奉常大夫夏東還至治癸亥又如京進奉  
帝所奏定甲子加中正大夫司僕正明年奏授宣武  
將軍合浦鎮邊萬戶府萬戶蓋世職也又明年改鷹  
揚軍大護軍又明年為選軍別監授田有法人便之



天曆戊辰如京師至順庚午東還拜正順大夫左常侍後至元乙亥封玄福君以公雅量不樂治公務故也歲丁丑作樓于崇教里蓮池之傍額曰雲錦益齋侍中為之記每花開設盛饌邀大賓上尊公壽子姓咸集時人歎慕之歲戊寅春三月 毅陵曰玄福君可與議故事於是批公匡靖大夫僉議贊成事時燕南梁載得幸於上公鄙其為人不與交禮載深銜之力沮其命明年再封玄福君一年而公以病卒于家歲庚辰四月初七日也正獻公王煦公之叔父也泣涕而言曰權氏子弟莫賢於萬戶吾嘗望其成宗族

焉天何奪吾賢子弟如此之亟乎正獻公不阿所好且有鑒識公之賢可知已公生長膏粱而卻美饍慶吊必親送人之葬不問宗族朋友玄冠素服戚見顏色觀者服其誠皆自以為不及平生善交人遇其患難盡力救解事已乃已雖好燕飲不喜聲妓又工射御田不詭遇而獲甚多武夫皆稱能也其所不樂者爵祿也獲乎親獲乎朋友其大欲也公所事而友之者如益齋李侍中淮安莊順公陽坡洪侍中安常軒安謹齋洪唐城金彥陽閔及菴崔拙翁李評理權襲僕射天慶皆一時豪傑文章故事馳騁射御人至今



宗之公游其間習慣如自然而又招故侍中金公逸  
逢習蒙古語多通之其才之美有足多者而天不與  
之壽何歟公之亡也祖父母父母皆無恙祖父母父  
母之心為如何而公之將絕也念及祖父母父母其  
為心又如何也嗚呼悲哉夫人趙氏都僉議贊成事  
謚忠肅諱璉之女妙年而寡教諸子有法宗族稱之  
公之沒今三十餘年矣諸子皆達官能世其家九原  
之下夫豈無知哉公歿時穉年總十三誰謂十二歲  
之童子當秉公幽堂之筆乎嗚呼是皆可以感矣公  
之諸子皆與穉善來徵銘故叙其家世歷官而書子

孫長男曰鋪宣授宣武將軍合浦鎮邊萬戶府萬戶  
重大匡玄城君次曰鉉宣授王府斷事官奉翊大夫  
版圖判書上護軍次曰錫奉翊大夫典法判書上護  
軍次曰鈞宣授奉議大夫隆祥提點所提點奉翊大  
夫典工判書上護軍次曰鑄中正大夫三司左尹進  
賢館直提學知製教長女壽妃也次適元朝翰林學  
士承旨榮祿大夫普達實理次適奉翊大夫判典儀  
寺事吳仲和次適中正大夫典儀令寶文閣直提學  
知製教庶國寶次適宣授征東行中書省都鎮撫司  
都鎮撫忠勤賈化功臣匡靖大夫攸堂文學進賢館



大提學知春秋館事上護軍元松壽孫男女若干人  
玄城君生二男四女文曰濬行首別將次曰演散貞  
女適別將閔公亮次適中郎將宋仁壽次在室斷事  
官生一男五女男曰壽安成均學生女適都祭庫判  
官金相次適寶馬陪行首別將朴子安次適別將金  
乙富餘皆幼判書生三男二女長曰澄行管郎將次  
曰澣成均進士次曰溥典寶都監錄事女適左右衛  
錄事洪希忠次適別將韓休提點生一男二女男曰  
弘成均學生女皆幼左尹生二男一女長曰壙次曰  
埴皆幼女幼外孫若干人承旨生一男一女男曰拾

得驢女幼具氏一男四女男曰齊甫興福都監錄事  
女皆幼廉氏二男一女長曰致中穆陵直次曰致和  
昌陵直女幼元氏二男長曰序僕頭店錄事次曰庠  
寫經院判官葬在開城縣大平院之西原銘曰  
既孝于親而信於人位又封君顯矣其身天子曰吁  
錫之虎符善繼家門光溢海隅多男而壽世則多有  
獨撫於公誰其掣肘惟時之寵匪賢不重公名不磨  
有荒丘壠



牧隱文集卷之十七

栗亭先生尹文貞公墓誌銘并序

栗亭先生既葬三月孫紹宗以所撰家狀求銘其墓  
嗚呼公亡矣余自燕京奔先子喪先生先諸公來哭  
哭既畢執余手歎歎良久乃去蓋今二十年矣不敢  
忘也而道途之遠也不獲匍匐往哭銘其可辭乎叙  
曰公諱澤字仲德曾大父良庇茂松縣令長大父諧  
正獻大夫國學大司成文翰司學致仕司錄尚州民  
有亂其妹者時旱甚正獻與長官爭竟置極刑天果  
雨歷任刑憲剛正自持慶尚金羅楊廣淮陽皆所按



察其為中丞饘粥不繼煎豆充飢而已世號清白考  
守平贈奉翊大夫密直副使先正獻歿妣金氏進禮  
郡夫人以至元己丑生公公生三歲就學既授縣成  
誦正獻每見公有警局抱之泣曰興吾門其汝乎守  
平為不死矣稍長痛自樹立從姑夫尹壯元宣佐讀  
書無不通究尤長於左氏春秋常誦范文正公先天  
下之憂而憂後天下之樂而樂以謂大丈夫寧可碌  
碌耶迨祐丁巳中進士舉庚申中秀才科寶劍賦第  
一人多誦之調京山府司錄董耕葺學勸民追遠禮  
俗以興八錄書籍事為校勘為檢閱官總九品自視

宰輔或以為侮公傲然處之不疑至順壬申 毅陵  
在燕邸公單騎上謁一見器重因有托孤之語意在  
今 上也公拜謝臣且老矣何能為明年 上駐駕  
西京以檢閱權叅軍供頓有制民賴以安 上每歎  
曰賢哉回也以公貌類西人故云詔使至 命公讀  
詔左右曰讀詔自有內外制叅軍恐非例 上曰叅  
軍為兩製願不在吾耶遂 命權應教賜紫未幾欲  
擢為府尹以資淺陞判官或誣公不遜 上曰尹生  
忠必汝罔也戊寅拜右副代言掌銓選 上欲官公  
子護軍公曰名器至重賢勞猶滯敢私臣子 上愈



重之已卯轉右代言試士成均取安元龍等九十九人多知名士三月癸未上寢疾上復以燕邸所語語公公跪曰無煩聖慮永陵立改政圖新公屏居自順明陵立被選牧羅州公所至政尚寬恕什強植弱聰陵立貶光陽監務初明陵薨民望歸今上公倡議拜書都堂言本國兄弟叔姪相繼之故少主不堪保釐之狀辭甚剴切聰陵喟之故有是命歲辛卯上初改入密直為提學慨然自任以當世之事上疏建白不允乃以開城尹致仕公年六十有四矣近臣議追鄉樂公聞之上疏曰世皇已嘗却

之今復進恐取譏又以節用上言上深納之築宮南京公言釋妙精惑仁廟幾至覆國厥鑑不遠矧今四境當備他盜訓兵養士猶懼不給興工務衆恐傷本根上命馮無逸齋賜宰臣命公講因陳周公輔成王勤勞曰願殿下成法成王能聽周公之訓嚴恭抑畏社稷之福上為動容公以真西山大學衍義本朝崔中令承老上成廟書皆進講時上深味空桑之譚超然有遠舉之志公曰殿下上奉宗廟下保生靈奈何欲效匹夫廢絕倫理之事乎如聽臣言非孔子之道不可願加聖意白岳之後



公極言其弊因曰凡事得失 聖意雖灼其然委之  
大臣未即處分因仍之際其害已成救之莫及 上  
賜酒公一飲三卮神氣自若前侍中洪彥博數曰不  
謂尹公贛直至此吾所不及也公雖致事自以 先  
朝顧托知無不言或至切直 上亦優容焉甲辰公  
年七十六疾作乞歸錦州以山水自娛者七年而憂  
君之心未嘗食息忘庚戌八月丙子前子孫而訓之  
曰吾正獻興寒地以清白忠直名一時吾先君不幸  
早世吾夙夜不克繼志是懼誤為 上知寵祿過重  
年逾八旬此皆先世潛德正獻清白之所遺也若等

其守之母墜我且死葬母均忌用浮屠法母後九月  
丁酉卒是夕天大風以雨既棺乃止已亥窆之于大夫  
人之墓側計聞 上悼甚下大常謚曰文貞公之哀  
榮可謂無缺矣公既早孤不及識先君面時祭上冢  
必哭甚哀公於方策見述父子之情未嘗不垂涕氣  
寒不能言常佩一囊得異味必盛之歸獻大夫人不  
以非笑少止尹壯尤歿女孫二人孤無所依公曰吾  
而不恤吾姑夫之孫吾尚為人乎擇士人嫁之游燕  
時道見遺金百兩守以待其主其主泣謝而去略無  
德色公平生布被弊席饗殮或缺晏如也至春秋良



晨必置酒邀客其任情自適又如此公凡四娶文氏  
進士富之女生龜生散員次李氏侍衛護軍長衍之  
女生鳳生別將女適進士金耀次適故起居郎知製  
誥許湜次奇氏贈密直副使璉之女生東明及第理  
部散郎女適即將朴龜齡又娶奇氏檢校大護軍鼎  
輔之女生故進士李存中室孫男九人孝宗散員癸  
巳進士昌宗散員嗣宗興順宮錄事宣暢學浮圖紹  
宗乙巳科杜元禮部散郎會宗興宗牧監直茂宗秀  
宗女四人外孫二人許操成均生今朴成女三人曾  
孫四人皆幼嗚呼磊落奇偉非常之材不世出出而

不遇與遇而不用與用而不久皆天也若栗亭先生  
之遇 毅陵之知可謂千載一時而 毅陵上賓之  
亟 今上既深知先生手寫真書栗亭二字以賜其  
遇極矣而公在政府才數閱月而致事家居者十有  
九年抗論雖切竟亦何補嗚呼悲夫銘曰  
堂堂文貞高視闊步雖則末寮巍然宰輔 毅陵一  
見出示肺腑溫言托孤果叶所負既試參軍欲尹其  
府姑陞判官可謂奇遇出納王言參與銓注蓋將納  
麓鼎湖淚雨扶日至忠先志後享人望公庸公懷不  
平不平伊何我言丁寧如藥瞑眩云胡不聽惟錦之



山有鬱其蒼有氣屬天實公幽堂厥或不信跡此刻  
章

鈇城府院君李文貞公墓誌銘并序

至正甲辰五月初五日推誠守義同德贊化翊祚功  
臣壁上三韓三重大匡鈇城府院君李公年六十八  
以病卒于第大常謚文貞有司供葬事如典故六月  
初九日窆大德山夫人洪氏域中明年

上思公親命工畫其形既肖錫朋酒以祭季子罔泣  
謝退徵繙銘曰銘之不登若有待今可銘矣繙以罔  
故父事公嗚呼忍銘諸公諱君佺字翼之後避兗人

名改岳字古雲晉州固城縣人曾大父諱瑄及第不  
仕大父諱尊流用儒術事 惠烈王掌銓選餘三十  
年試士成均又知貢舉率官判密直司事監察大夫  
父諱瑀以材幹歷使淮陽金海全晉二牧所至有遺  
愛封鈇原君妣朴氏咸陽郡夫人父諱之亮判三司  
事有功至元間

天子賜金符授萬夫長公髫髻異九兒入小學已稱  
善書年十七中癸丑科知貢舉權故丞崔資成大加  
賞異曰公輔器也自是學大進華問日播 毅陵愛  
其材命典符印除官秘書省由校勘再遷為郎注簿冊



陽府佐都官就陞正郎 永陵初元以典儀令擢密  
直司代言無監察執義同知辛未貢舉至元庚辰復  
職知中事俄改成均大司成階奉翊未幾有旨成均  
師道所在任亦重矣然左右行理兩府實專其職其  
予樞密同知 命下朝士相慶曰善人與故矣既而  
遷故堂文學僉議評理知辛巳貢舉是時用事者詆  
姍我儒公孤立無助志竟不得行然亦多所匡救焉  
明陵立眷顧益豐加贊成事 聰陵立以為 先王  
舊臣之中有德有勞惟李某可輔予故遂拜左政丞  
未幾罷 今上還國欲用公未果令襲父封開府以

致敬三年癸巳公自念年將六十位亦極矣不以此  
時乞骸骨復何族去入清平山 上求理甚惡徵禮  
耆老公還諭留之時時召入對遂決意用公八年戊  
戌秋復為守侍中已冬冬毛賊犯北鄙以公為兵馬  
都元帥往督諸軍軍未集而賊已近矣西京守臣謀  
守不可又欲謀焚倉廩公曰非計也賊遠鬪其鋒不  
可當不中止其勢必震我國都欲賊中止莫若啗以  
此城可令吾民挈老幼東走鎬倉廩屋廬無所壞賊  
見必怯我亦且少駐怯我心驕少駐氣衰俟吾軍集  
可一旦襲取安知今日所欲焚者不為吾他日用乎



未踰月賊果敗如公所料倉庫屋廬完全如初辛丑  
冬從 幸安東功第一明年賊平行賞公面奏今不  
幸罹茲多故將相領才臣以無狀久叨充揆請避賢  
上愈益嘉其無他加賜功臣號封君奉朝請公於官  
勤謹守絕墨無一毫假貸於家不問有無費圖書自  
娛淡如也與禪源負影老人為方外友築堂寺中扁  
曰海雲扁舟往還至輒忘歸蓋其雅量如此杏村其  
自号也嘗手寫太甲篇以獻語其子岡曰汝志之吾  
既老矣無官守無言責當以格君心為務尔公自秘  
書以至宰相必與銓選予奪不以私故終身無怨言

前後門生多達官聞人諸子皆有所樹立嗚呼天之  
報施善人其有徵哉夫人侍中謚忠正諱子藩之曾  
孫右代言諱承緒之女先公二十七年歿胤慶配德  
母有多子男四人寅中正大夫宗簿令次崇正頌大  
夫判典客寺事次陰與平毛賊以功拜上將軍辛丑  
冬戰歿安州次即岡今為密直司知申事藝文館提  
學知製教知典理司事女二人一適判事金光丙一  
適淮陽府使趙慎側室子曰牧郎將孫男某某官曰  
某曰某孫女若干外孫金某某官曰某曰某外孫女  
若干銘曰



魏文貞開府鉅城初宅右揆曰噫戒盈奉身而退  
水綠山明如雲卷舒香手無情還居廟堂不動色聲  
長蛇封豕就戮西京天啓公衷從容策成俾驕以覆  
九廟不驚人始歎服詩書用兵天已蓋世其細美評  
王曰尤老雖死猶生我儀圖之以風列卿既成既肖  
明裡緇評列卿用勸子孫與際自古在昔君臣聚精  
不亡其亡匪他曰誠詔甫太史尚徵斯銘

松堂先生金公墓誌銘并序

至正辛巳予年十四赴成均試在庭中望見先生具  
袍笏端坐儼然如泰山喬嶽群士屏氣不敢譁既為

門生往來聽教則溫言柔色推明國典獎誘人材豐  
豐不已慨然有風俗日頽之歎居家不理生產左右  
琴書澹如也栽松東岡植蓮南池每歲庭中牡丹花  
開具酒食召門生上太夫人壽兄弟子姪怡愉之  
孝悌之至通于神明太夫人享九十一歲之壽嗚呼  
盛矣歲丙申三月太夫人以病卒葬于皇考文正公  
之墓次居其傍終制先生素以病艱於行步然朝夕  
奠洒掃必親無少輟國俗守父母墳多以奴代私為  
復其身先生不忍變其親躬行之蓋近世宰相所未  
有也先生姓金氏諱光載字子輿號松堂居士光州



人司空金吉之後也司空佐

太祖有功其裔孫諱匡瑞中郎將中郎將生諱偉三  
司使三司使生諱鏡亮大將軍大將軍生監察御史  
諱復元初三別抄者不樂內附叛入海島御史守靈  
光死之御史娶國子祭酒高公諱瑩中之孫某官諱  
第卿之女年五十二歲初高氏夢見明星入懷中生  
快軒先生文正公諱台鉉以四世元老為國著龜政  
丞致事嘗集國初以來文章自曰海東文鑑行于世  
掌試成均知貢舉所取士多聞人竹溪安謹齋崔拙  
翁无其傑然者也先娶行首郎將金儀之女生一男

曰光軾官至選部議郎納室以

太祖子孝隱之後侍郎諱丁旦之女生三男二女長  
光輟及弟官至密直使次先生次光輟及弟女長適  
政堂文學安牧次適密陽君朴允文公之昆季三人  
既登科大夫人受廩祿終其身朴氏子四人安氏孫  
三人皆登科時人歆之公以元甲午正月甲子生  
既生而身長二尺餘父母異之絕愛之既冠中皇慶  
癸丑科座主一齋先生權故丞愛其知禮厚待之補  
成均學官至順庚午從 忠惠王京師以勞授司僕  
寺丞遷都官正郎後至元己卯 忠惠王薨為曹頤



所廢而幸勝之然其儻多附勢必將甘心焉及王  
如京師公曰吾君危矣吾忍獨免乎哉往從之賴  
天子聖明復爵東選寶庚辰秋七月也以軍簿摠郎  
參銓選事累轉成均祭酒三司左尹判典校寺事皆  
兼館職知制教明年秋掌試成均取令知密直司事  
成士達等九十九人時稱得士 忠惠王素憚公嚴  
左右又多忌之顧無所藉口迺曰金公愛靜仕進非  
其志也 上稍信之乃褫其職群小益張癸未冬岳  
陽之禍起矣甲申 忠穆王立起公為右副代言遷  
至知中事用事大臣惡不附已白授版圖判書未幾

上悔之即拜密直副使提調銓選事陞知司己丑  
忠定王立開書筵以公為師公固辭入僉議為評理  
匡靖大夫藝文館大提學知春秋館事上護軍仍提  
調銓選事俄改三司右使入告于 王曰文選吏曹  
掌之虎選兵曹掌之摠于政房自權臣始非令典也  
殿下如聽臣言仍舊便從之然必 公命公兼典  
理判書字卯冬十月

玄陵嗣位公杜門不出奉養大夫人朝夕盡禮及其  
琴祥侍中洪陽坡先生與一時名卿往勞苦之公曰  
吾年六十三始居于茲常懼一旦身先朝露以為宗



族羞獲至今日考妣之德也言畢泣下諸公皆泣下  
嘆服既還設版位於堂北隅每行事泣不止以舊病  
不出門 玄陵聞其風使使諭公曰思與公語久矣  
不識可使寡人得見乎公惶恐子姪扶以入 上曰  
年顏非甚衰也而有斯疾何耶嘆惜者久之命有司  
旌表所居曰靈昌坊孝子里復其里若干戶以奉祀  
焉辛丑冬十一月避紅賊至高昌縣因留居之癸卯  
春三月感微恙起居語言無以變十四日既晚謂夫  
人曰吾今年七十死復何恨男子不絕於婦人之手  
禮也可與衆婢退矣且戒無或高聲疾語以擾我也

俄而絕平日所養可知已子壻扶柩還京某月甲子  
葬于德水先塋公娶門下平章謚良簡金公諱永澤  
之女生子二人男曰興祖儻有志官至中顯大夫  
軍器監使水原海州政績頗著死於鷺城之手人  
至今憐之女適奉善大夫內府副令朴門壽新羅始  
祖奕居世之後也孫男女若干人軍器監監察大夫  
申仲全之女生一女適郎將宋義蕃內府生二男長  
紮好尚志前奉善大夫左右衛保勝護軍李老進  
士典儀錄事外曾孫若干人皆幼護軍以公行狀徵  
銘於韓山李藩曰子宜銘乃受而叙之嗚呼先生之



德行政事表。如此宜其子孫之多也。而軍器監無後是天之未定也是天之好惡與人殊也。嗚乎悲夫。幸而朴氏存焉。士之樹立以顯其外。大父者史不絕書。朴氏其勉旃。其勉旃。銘曰。

惟東有岡有松蒼々君子之宅池水之盈蓮香之清君子之德出以事君有政有文正我王國入以事親愈若愈真化我民俗先生之風被于海東永世攸則我作斯銘匪私先生史筆之有

海平君謚忠簡尹公墓誌銘并序

善之海平望姓尹氏也諱君正歷事 高王 元王

官至金紫光祿大夫守司空尚書左僕射判工部事諱萬祀事 忠烈王為己巳一等功臣卒官奉翊大夫副知密直司事上護軍諱碩政丞公也朝廷使者至政丞時為別將以蓋人立于 王前使者傳旨兩王子入侍天庭政丞聞之默自念吾當從弟歸告尊公尊公曰兒計失矣所以從 王子者為後日計也兄在而弟先有國乎公又告曰吾亦知其然然吾見少則敬心生見長則否此所以決吾策也尊公不復語長 元子早亡少 忠肅王也公從朝京師僚佐未有居公右者其後歷官至都僉議右政丞判



典理司事封海平府院君階壁上三韓三重大匡賜  
忠勤節義同德贊化保定功臣之號亦未有居公之  
右者君臣遭逢千載一時豈非天乎其後  
天子聞公名特授鎮國上將軍高麗都元帥以寵異  
之海平娶奉翊大夫密直副使上護軍李公諱百年  
之女以至大庚戌四月癸亥生公延祐庚申公年十  
一而補泰雲手真發直十五而補司設直長十六而  
授郎將十九而拜護軍從 永陵在朝之明年也時  
晉邸陟遐  
文宗自江南先入宮正位迎

明宗于朔方

文宗出勞于野丞相燕帖木兒進毒酒

明宗中夜崩六軍亂公與宰相曹益清李君佺等官  
左右 永陵永陵恃以無恐賜功臣鈇券至順庚午  
陞大護軍公年卅一也至正辛巳進判司僕寺事  
明陵即位之五月拜上護軍冬陞軍簿判書明年四  
月遷典理判書王政丞當國用舊法文選歸之典理  
武選歸之軍簿公佐政丞無毫髮私明年出尹平壤  
試公臨民也甫一期而政成以知密直召公年三十  
八矣 玄陵之五年再知密直司事其冬奉表朝于



京師謝賜衣也十八年三知密直司事洪武庚戌進  
密直使明年知門下省事商議會議都監事又明年  
進評理冬封重大匡海平君與廩曲城尹恣原諸老  
結社從容者十餘年而壬戌九月感疾十月初九日  
端坐而逝公年七十又三矣公稟性寬厚不立崖岸  
略通蒙古語舉止如北庭人於政事務遵大體而不  
苛細蓋長者也公凡再娶平壤郡夫人趙氏大匡僉  
議贊成事商議賢文閣大提學謚文克諱迺壽之女  
李氏大匡月城君諱禧之女趙氏生男二人長曰寶  
官至鷹揚大護軍先歿次日珍重大匡海平君孫男  
女若干人鷹揚男曰可觀今為奉翊大夫密直副使  
上護軍出為慶尚道副元帥一女適尉衛注簿李持  
海平君男曰彰今為典理佐郎次曰萃今為德昌府  
舍人次曰復今為春秋檢閱長女適判事金九容次  
適即將洪潤福次適司設署令成溥李夫人無子曾  
孫男女若干人某之公之奉表謝恩也予為書狀官  
公之長子予同甲也故父事公予僦倅入樞府而公  
復職為同寮然予之事公也如昔而公亦視予猶子  
吾宜銘公人之季子政堂公今嗣封其知貢舉也又  
取豚犬種善為門生銘又可辭諸銘曰



海平之尹左右 高元君子之澤流慶源之惟元帥  
公爵為侍中忠簡承之有長者風少而翹英老而享  
榮李季緇相而與文衡孫拜中樞折衝海隅惟公之  
門施張攸俱允厥降梓惟善是彰我非諛公公永于  
藏

牧隱文集卷之十七

牧隱文集卷之十八

有允高麗國忠勤節義贊化功臣重大匡瑞寧  
君謚文僖柳公墓誌銘并序

玄陵功臣曰文僖公姓柳氏名淑字純夫至正辛巳  
以侍學從

玄陵居燕京十一年受履以東叅掌機密十五年退  
老子鄉以避鷲城之禍者四年既卒四年而鷲城誅  
又六年而配享 大室又三年而韓山李穡銘其墓  
嗣子密直公之請也嗚呼忍銘諸至正丙戌先君稼  
亭公領曆東方文僖公實從之來穡始得內交焉其



後同事 玄陵播或時妄設言觸怒公輒救之其於  
銘墓義所不辭按其婚李行旣撰公狀柳氏瑞州人  
也曰公器承奉即閣門祗候曰宏贈僉議評理上護  
軍曰成桂通議大夫大常卿知茶房事公之三代也  
妣姜氏贈都僉議贊成事諱文世外大父也室揚氏  
吳氏男實奉翊大夫密直副使商議會議都監事上  
護軍厚奉常大夫軍簿摠郎女三人適中顯大夫繕  
工令金子盅承奉郎版圖佐郎崔正濡楊氏出也一  
適宣德郎義盈庫副使李行吳氏出也孫若干人密  
直男曰惠剛別將曰惠南學浮圖法曰惠和散員女

適丁巳科狀元承奉郎典儀注簿成石珣摠郎男曰  
沂曰漢文一人外孫若干人繕工男曰汾曰潭副使  
男曰述曰述女一人佐郎女一人公之初入學也精  
舍主人夢見灑掃院字問何為對曰柳承旨來明日  
公至心異之年十六中辛未進士科諫議大夫金右  
鑿其試官也二十五中庚辰及第科政丞金筠軒未  
暇贊成事安謹齋軸其座右也至正辛巳調安東司  
錄會 玄陵以三大弟江陵府院君入侍  
天庭公棄官從之居四年歲在甲申 明陵即位江  
陵僚佐多不守節公獨不變 明陵義之冬授吉昌



府典籤明年升開城參軍公益堅無他嘗一覲親既至則史翰交章薦公補春秋修撰官公曰儒林重選也吾雖不才亦足以慰吾親矣遂就職即領曆書也明年丁亥 忠烈 忠宣 忠肅實錄既成命公馳駟畿之海印史庫秋遷三司都事即棄去如京師時掌銓選官以為御史官供史職既有勞宜錄用授官秩一品 明陵薨王政丞倡義上表請 玄陵嗣位又以耆老衆官書達 中書省執亭公實執其筆旦夕 命且下公聞母病即日請歸或止之公曰忠臣孝子名異實同本末則有序焉孝之或廢忠將焉

出又况忠之日長孝之日短萬一有不諱悔之何益遂歸母見公喜病即愈又從先稼亭公游金剛山縱觀東海公曰今燕邸又如前日吾不可以久留遂如京師實 聰陵元年己丑也歲辛卯秋九月 玄陵即位行至遼陽省授密直司左副代言軍簿摠郎階奉常大夫藝文館直提學知製教兼春秋館編修官知三司事有 旨參決機務然非有召未嘗詣 內明年進右代言左司議大夫宰相趙日新忌公公乞解職屏居德水莊既而丁外艱日新聚群不逞誅殺所忌未幾伏誅癸巳四月起復供職代言甲午二月



遷左代言知軍簿司事乙未正月掌成均試取全朝  
等九十九人拜奉朝大夫判興校寺事藝文館提學  
同知春秋館事上護軍其秋再遷版圖判書典理判  
書歲丙申姜資正金剛降香金剛山命公護其行既  
至山曰吾疾作欲少留願公善辭焉因居青蓮寺數  
月三召公不獲已還朝五月奇氏之難作入密直為  
提學官制行拜銀青榮祿大夫樞密院直學士翰林  
學士承旨上將軍事定 賜安社功臣鈇券公謂諸  
公曰功券即罪案也願賜相勉保終始如汾陽郭氏  
可也又曰君子不黨善决不黨於人願同心奉 王

室無私黨幸甚俄改副使歲丁酉進同知商議會議  
都監事歲己亥進知院提點司天臺事辛丑冬沙賊  
犯黃州勢甚逼廷臣不知所為公從容決策南擊其  
言曰國所恃者城池也糧食也今城未完倉無儲萬  
一賊在四郊將何以守乎既至安東府進樞密院使翰  
林學士承旨同修國史明年賊平三元帥功益高擅  
殺摠兵官鄭世雲則又曰今既殺摠兵官矣柳某居  
中每出奇謀可畏也去之便公知之告于 上曰  
衆怒難犯今諸將忌臣者徒以在 殿下左右耳  
殿下如逐臣則臣一布衣耳誰復置齒牙間邪於是出



為東京留守至府十有餘日措置已愜民望 國  
家既正允帥罪名三月以知都僉議 召進階匡靖  
大夫賜功臣號忠勤節義贊化六字吏民曰何不留  
公數月奪之棘乎其秋 駕移于清同知貢舉取朴  
實等三十三人時稱得士冬遷評理提點書雲觀事  
洪氏有封翁主者在嵩陽貧乏不能自存 上憐之  
下手教於按廩使李之泰賜采之泰曰凡 上命必  
由兩府而頒布于外今將奈何不敢不受又不敢拆  
間之案上其人怒復之于 內 上謂之泰不恭將  
使使械之泰來罪且不測公固執不可 上怒甚曰

事皆由卿等耶月公曰出公趨出 上復召公公伏  
於前具以之泰之語白之且曰如 殿下怒不已臣  
恐後世以為口實於是置之泰不問他日復召公入  
公謝曰臣受 恩既久而無纖芥之効反以口舌妄  
觸 天威罪在不赦 上賜黃金以慰之且曰賞卿  
之言也問以盛滿難居乞骸骨保餘生 上久而後  
許之封瑞寧君因請孫搢至京明日又 召歲癸卯  
駕還京以興三寺為行宮賊用夜半潛入內殺直宿  
官 上避於密室聞賊相語 曰何故來遲賊曰殺  
洪某抑某故遲來既而諸將率兵入救公隨之入 上



卷八  
五  
曰謂卿已死不復再見及見卿面疑其思成聞卿之語疑始釋矣即日入城拜政堂文學冬十月兼監察大夫歲甲辰進僉議贊成事商議會議都監事藝文館大提學知春秋館事上護軍領書雲觀事歲乙巳三月封瑞寧君肫故也肫之出入禁闈外托浮圖內懷謫詐公稍抑之及其長髮冠顛領都僉議作威福中傷大臣氣焰可畏每招公公絕不往來及其秋乞歸田里卜等伊山縣之伽伽山優游以自老京山樵隱先生寄以詩有已向危時安社稷更後平地作神仙之句歲戊申肫之浸潤既久其計得行縊于

靈光郡十二月廿一日也公之屏居也聞國家事異於平日未嘗不涕泗交下及其禍作家人以公平日之言送龍腦又謂不如走乃送良馬曰公其自擇公曰吾思之君父天也天可逃乎且生死有命固當順受已將何之就死顏色如平時人皆為之流涕及肫敗

上始知其然悼甚有旨雪其寃謚文僖歲壬子正月十一日以禮葬于德豐縣加也洞丙辰十一月玄陵祔廟廷議配享公得與焉此公哀榮之大槩也若其謀猷之密操履之詳有所薦引未嘗言之其人



有所罪黜未嘗斷之於已遇大事決大疑又未嘗猶豫其間蓋於精明仁恕兩得之矣宜其嗣子賢也銘曰

文僖有質義王之潔文僖有行熏風之發遇事精彊存心惻怛相我玄陵夷險一節告老縣車矯命賜殒命也奈何時哉昭雪於大室允矣功烈天道不爽赫如對越刻石幽室用告來哲

文敬李公墓誌銘并序

先稼亭公嘗知丁亥貢舉所取士多聞人文敬李公年十五神采矍然當時已謂有父風云其後學遂識

高名日益重堂堂乎宰相之材矣及其病也衆以為必無患也斯人豈止斯哉及其已也又以為生之不辰乎藥物之有誤乎何斯人而至於斯乎士大夫相與弔於朝親戚故舊相與哭於其位行路為之嗟惜上聞之悼甚命重賻下太常議謚若曰樞密不應謚吾特褒岡者文臣服勞久政堂文學松壽耳吾是以不能忘異體同功今岡而已議既上上曰文敬准岡足以當之嗚呼公可以無憾矣其友人上黨韓脩孟雲曲城廉興邦仲昌父謀於韓山李穡曰自吾友已人孰不悲之然猶未免死吾友使可傳者傳而死



則吾三人者之責而亦所以自慰其悲也於是銘  
屬穡脩書興邦篆而其刻石則仲昌父孟雲實幹之  
嗚呼悲夫吾尚忍銘吾友也哉公諱岡字思早初名  
綱避同列名遂改之姓李氏固城人曾祖諱尊庇判  
密直司事兼監察大夫有名 慶陵朝祖諱瑀鈇城  
君父諱岳都僉議侍中諡文貞書法妙一時號杏村  
毋洪氏侍中諡忠正諱子潘之孫右代言諱承緒之  
女初以門功錄事僕頭店既第丞慶順府於典儀為  
直長主簿又為令兵部為員外門下省為司諫吏部  
為郎中戶部為侍郎密直司為代言知申事提學副

使歷內外制館職至大提學官至奉翊大夫 聰陵  
在書筵選充侍讀及遜位公後之居其立志可謂不  
苟矣 上即位之五年乙未召見奇之即授主簿令  
掌符璽自是常在左右愈久愈謹其在吏部當遷公  
奏曰臣執筆注臣名臣實不敢 上益重之辛丑秋  
為慶尚道按廉使會北邊失守舉國南徙入其境供  
待充斥所至如歸士氣復振率羸兒黨蓋有助焉既  
還京代元文定掌銓選方邊報絡繹上下維持各飽  
所望而成駿功公之力居多侍中之歿 上親圖其  
形雖 上所以褒異大功臣歆動衆心其德甚盛亦



由孝誠能有以動天也至於臨事懼交友信好善之  
篤存心以平吾所以友也天或假年坐廟堂決大疑  
行大政無不如志則吾將師之而未果也悲之庸有  
既乎夫人郭氏考判開城府事諱延俊女若干皆幼  
男一人今年生某月某日卒某月某日葬城南藍村  
享年三十六其銘曰  
胡畀其全而不于年夢夢乎其天之未定也我鑄斯  
銘千載而鳴尚有致乎吾文敬也

有元資善大夫大常禮儀院使高麗國推恩  
守義同德贊化功臣壁上三韓三重大匡益

山府院君諡文忠李公墓誌銘并序

益州之李其稱蓋以尚書左僕射諱南衍生參軍諱  
淵然軍生直史館諱英棟直史館生贈尚書左僕射  
諱陽真僕射生銀青光祿大夫尚書左僕射翰林學  
士承旨諱漢承直生朝奉大夫國子典簿寶文閣直  
學士知製誥諱行儉以直節聞其為刑部官同僚逼  
於勢屈訟之直者典澗死執不可會疾作在告同僚  
幸亦無公即決之人有夢利劔自天而下斫刑部官  
吏未幾皆暴病死獨典澗無恙至今稱誦典澗生承  
奉即監察糾正諱崖取通直郎中宋耽之女以至大



戊申十二月二十四日生公既而母已養於宰相全  
公諱思義之家公之姊夫也及全公拜公已光顯矣  
如子事父全公致事其姊如母葬同其穴祭盡其禮  
老而不衰可謂能後已至元庚辰公年三十又三矣  
上洛君金公諱永暉順興君安公諱軸掌禮園諫公  
以即將兼監察糾正擢狀元至正卒已再遷典儀注  
簿成均直講歲壬午轉奉善大夫成均司藝藝文應  
教知製教歲癸未加奉常移典校尉全充春秋館修  
撰官歲甲申進中顯大夫典校全密直司右副代言  
藝文館直提學知制教乙酉遷至知申事其冬移典

理判書明年進監察大夫丁亥秋七月拜密直副使  
戊子春正月進匡靖大夫判密直司使四月入賀  
天壽聖節夏六月兼監察大夫歲庚寅拜政堂文學  
歲壬辰閏三月遷僉議評理又兼監察大夫冬十月  
改三司右使歲癸巳復入都僉議進贊成事歲乙未  
知貢舉取安乙器等三十三人多為達官聞人是歲  
玄陵辟為東省都事拜受教牒詣內謝恩未幾辭  
不就職進封三重大匡益山府院君歲辛丑以賊犯  
我北鄙公禦之于竹田京城失守公以單騎追及行  
宮于中原上喜甚厚禮焉歲壬寅夏六月拜贊成



事進判版圖司事藝文館大提學知春秋館是歲以  
賊既奔潰京城新創于兵庶事草創公受命而來  
量材度事指授方畧朝無廢政勞未嘗輟給糧與種  
野無游民祀宗廟祭先聖先師廩生徒內外學悉贍  
道成禮俗養育人材蓋於投戈講藝息馬論道之義  
深有所得焉歲癸卯迎駕還京奸臣崔儒奉德興君  
緣寅權倖謀廢玄陵受命將行於是命公奉表如  
京密直提學許綢輔之行至西京詣太祖原廟再拜  
誓曰吾君而不復位臣公遂之死不復還既至都  
皇后皇太子郊勞給繹四月初三日帝在興

聖宮命典瑞院使完澤為召公入勞之公獻禮物既  
而皇后設饗厚慰謂公曰公既盡心孝吾母是吾  
親兄也敢不以待親兄之禮待公乎公曰周姜嫄大  
任太姒育聖基化風雅存焉及其中衰姜后待罪宣  
王以興褒姒呂武覆宗絕祀羞惡昭然千載龜鑑我  
高麗之於大朝也戎臣結為兄弟於初天子定  
為甥舅於後百有餘年魚水相得矧今殿下即周  
之姪妣也三韓之幸於斯為大今王勤王敵愾為  
國討勲當行賞典昭示四方以激將帥之氣奈何遂  
私憾廢公義乎丙申之禍實我家盛滿不知止之之



所致耳非王之罪也不知自咎而欲廢有功之主朝廷無人乎他日必為天下笑願 殿下善奏于帝復吾王逐奸臣幸甚幸甚 皇后雖感其言怒猶未已遂令公奉德輿東歸公托疾請留於是 有 旨高麗人在朝者李公遂外皆從五行二十一日拜太常禮儀院使明日入奏臣生長邊方言語不通不習中國禮何敢冒寵取譏今將帥布列于外獲功者未賞臣恐天下有以議 陛下也既不得命二十七日之任資政院奉 懿旨盛設禮食以饗同寮 宗廟大享公再為大常卿循蹈禮則觀者敬之於是贈祖祭酒

公中奉大天集賢學士考糾正公資善大夫典瑞院使祖妣鄭氏妣宋氏室金氏皆封隴西郡夫人 皇太子以 帝命召公同上萬壽山廣寒殿 太子問殿額仁智之義公曰愛民之謂仁辨物之謂智帝三用二字御四海萬世太平矣入殿指金玉之柱又曰老人曾見如此之柱乎公曰聞之帝王教政施仁則所居之屋雖朽木猶金玉之堅不然則金石之堅反如朽木也出殿賜王家奴太師伯撒里少保坐命公坐其次禿魯帖木兒詹事立彈瑟 太子取而彈之未成曲捨之曰父不習忘之矣公即跪曰憂民之心



不至于忘則瑟上一二調忘之何害 帝在太液池  
舟上 太子以公語奏之 帝曰吾固知此老賢者  
也汝外家唯此一人耳一日 皇后問兄王章家禍  
所由公曰貪財聚怨鮮有免者勢激而然非王之心  
非王之罪也宦官朴不花密告于 皇后曰李某但  
為其主豈念其親 皇后久不召見德興君既至遼  
陽路崔儒曰李某在都其心莫測事或中變悔之何  
及重賂秃魯帖木兒朴不花必欲得公以歸公知之  
謂其書狀官林撲曰吾既無父母又無後位又極矣  
豈復有一毫顧藉意耶當祝髮入山決不從彼也二

人入奏 帝不允秋七月李羅帖木兒引兵入城黜  
丞相搠思監代其位秃堅帖木兒為臺臣革弊政迺  
曰高麗王有功無罪而為小 人所困蓋先治之於是  
降 詔復位械崔儒以送公亦乞歸田里出齊化門  
使蒼頭吹笛謂後者曰天下之樂復有加於此者乎  
公途馬困蒼頭以一矢買一束穀飼之公見之曰何  
故奪窮民之食乎截綿布以充其價問山站無人粟  
積于野公問粟一束直木綿幾尺如其言書於兩端  
置于粟積中從者曰持馬者回必取之去何益不如  
不償之為愈也公曰吾固知之矣然必如是然後吾



心安馬耳十月二十五日京詩閣門告曰奉使臣李  
公遂迴略不及艱苦狀上厚待之時成均館工役  
方與公聞之大喜即解御賜金幣助其費驚城當  
國頗忌公公亦以盛滿自戒杜門不出公既如京師  
夏四月拜公都僉議左政丞判軍簿司事明年十月  
十七日進推忠守義同德賞化功臣壁上三韓三重  
大匡領都僉議事右文館大提學監春秋館事二十五  
日至國歲乙巳六月封益山府院君是以未嘗一日  
坐朝堂行冢宰事人頗恨之嗚呼公之精明慎謹一  
時者奮大臣罕見其比至於果斷剛毅屹然不為形

勢所屬而風流閑雅山野之趣有不能自掩焉者置  
別墅於德水縣自稱南村先生幅巾藜杖招同年諸  
公嘯咏其中或門生進謁輒醉以酒夫人金氏新羅  
金傅大王十二世孫三重大匡義興府院君金公諱  
上琦之女有賢行克配君子宗族稱其仁丙午歲五  
月初一日以病卒于第訃聞上哀悼命易名曰文  
忠官庀葬事二十四日窆于別墅西山之麓公無子養  
族女適成均生負安東嗚呼李氏八世至公而益昌  
如典酒之德之名天固審其位矣糾正公積善以承  
之是以有文忠之報也文忠益大其門既光其祖矣



而又無後信乎其蒼茫無端而暫寓於其間矣嗚呼  
悲哉公諱公遂字 其所居曰衡齋公之頌  
聖節也稽實後之受業胄庠用文科躋職仕以至今  
日皆公之賜也銘其可辭乎銘曰  
三冬而青松也惟貞百鍊而剛鐵兮孔良懿哉文忠  
委地朝中有冽其泉有熏其風盡忠所事帝嘉其志  
成功不居人服其義從享大室效同其吉匪功之多  
迺德之一雖無子孫祧廟之存

坡平君尹公墓誌銘并序

至正辛丑冬沙賊逼京城 玄陵決策南幸士大夫

多棄官奔竄坡平君尹恢以前福州牧使匹馬危  
駕至廣州坐客舍門談笑自若予始得知其面蓋奇  
偉人也予之在病中嘗問疾焉見其色若甚哀予予  
至今不敢忘也嗚呼公之歿已五年矣而以病餘拙  
文銘公之墓豈不可感也夫公諱恢字子奇坡平縣  
人也十三世祖罕達彌三韓功臣生功臣先之功臣  
生左僕射金剛左僕射生右僕射執衡右僕射生推  
忠佐命平戎拓地鎮國功臣開府儀同三司上柱國  
守大尉門下侍中判吏部事鈴平郡開國伯食邑三  
千五百戶實封三百戶監修國史文肅公瓘 睿王



時女真侵我疆文肅公率兵逐去之女真遠遁立石紀功而還文肅生中書平章事彥頤有志氣達死生之理將易箒有詩一篇類禪者語平章生尚書兵部侍郎惇信侍郎生衛尉少尹商季少尹生大常錄事諱復元於公為高祖錄事生曾祖監察御史諱純御史生祖鈴平府院君諱珪鈴平生考少府尹諱諳娶萬戶判三司事朴公諱之亮之女以尤貞丁未七月某日生公公年十四以門蔭授周陵直至元庚辰超授興威衛精勇護軍階奉善大夫賜紫金魚袋明年陞奉常燕通禮門副使與珪司旋皆中其度護軍四十

餘人多驍傑豪放不拘繩墨公動以禮法至今矜式焉歲壬午進親禦軍護軍監試主司閔思平家奴取柴城外而拏生松班主印安適出郊法當禁故禁之家奴不知其為班主也聚擊之傷其脚王大怒令重房壞主司宅公以謂奴信有罪矣其主何與焉且今多士刮目放榜而壞主司宅主司何心而考閱哉未幾上怒解事得寢歲癸未進中正大夫三司左尹公以廉勤為寶興庫官凡三年及王被召赴都政丞洪彬會計錢物獨公無少汚洪公嘆賞之歲己丑選臺臣執政者皆曰尹某世守禮尚清節且知綱



紀大體無以易此人也遂遷執義多所立白雖未盡  
行名動一時持平鄭國經亦以清謹慷慨為人所望  
時察院有執義執綱持平持節之語縉紳歎之歲庚  
寅以奉順大夫判少府寺事知典法司事裁決平允  
人無怨言 玄陵五年乙未授監門衛上護軍重房  
諸吏素知公名敬憚之不敢欺閱月而有福州牧使  
之命措置有法民受其賜辛丑冬命其子今密直公  
曰吾不可不赴行在所也汝其與汝母便道而去遂  
從 王行為慶尚道點軍兵馬使既而克復京師而  
錄功臣公功在二等知公者皆謂公屈盡訟之公笑

而不答歲甲辰進奉翊大夫判典儀寺事歲壬子拜  
典法判書甲寅冬封坡平君階大匡公嘗曰吾家侍  
中公而下九七世登科而吾父子悔之何及丙辰冬  
十二月十二日以病卒于第享年七十明年正月甲  
寅葬于松林先塋夫人崔氏奉常大夫司憲掌令諱  
甬之女生四男二女長曰虎奉翊大夫密直副使上  
護軍次皆夫女長適判內府事金懷祖次適知驪興  
郡事柳之茂孫男女若干人密直公娶知善州事李  
公允厚之女生一男二女男曰 女長適中書舍  
人方恂次適閣門祗候南在內府生三男四女長男



曰瞻門下注書次曰盱次曰盼幼文適護軍金保餘  
皆幼驪與生六男一女長曰某次曰其餘皆幼密直  
公端謹有志善書能摹寫為 玄陵所知 玄陵命  
書古詩以進蓋賞其筆跡也公曰月露風花非研以  
陳於 王前乃書欺暗常不然欺明當自戮難將一  
人手播得天下目既進 上謂其論諫寢疎之君子  
曰公於是不負所學矣嗚呼坡平可謂有子矣密直  
公又曰吾父平居不喜飲酒當飲又無量生而無疾  
性尚儉約以肉食暑必具服寒不重裘其於聲色遠  
之又甚 通制條格本國判官留意尤深天不與之

命奈何奈何予於是益知公之有子也銘曰  
鈴平之封王錫尹公出師闢國乃碑其功襲封開府  
在于公祖公克嗣之惟仕之臚惟公之名惟誼之明  
位不稱德孰司其平幽堂之誌于永廢跡匪我之謏  
公有賢子

牧隱文集卷之十八



牧隱文藁卷之十九

驪興郡夫人閔氏墓誌銘

吾友金九容氏以今年閏五月甲辰葬其母驪興郡  
 夫人閔氏于祖母金氏之塋直其西十數步既而走  
 其子參軍事明善承銘予義不辭按其狀輸誠秉義  
 協贊功臣重天匡都僉議贊成事進賢館大提學知  
 春秋館事謚文溫及菴先生諱思平其考也匡靖大  
 夫密直司使謚文順諱迪其大父也僉議贊成事謚  
 忠順諱宗儒其曾大父也都僉議故丞謚貞烈竹軒  
 金公諱倫其外祖也內外赫然一國所慕而夫人生



於其間習熟見聞允可當為盡是皆以母則為本事  
父母甚孝朝昏定省不以疾病廢宗族稱之卒丑冬  
避賊南遷奉母以行安焉如在室中其後居驪興  
十有餘年事之益勤母既歿美夫人之子婿每請還  
京夫人涕泣曰吾母葬於斯吾去矣拜掃闕矣吾何  
忍焉吾何忍焉五月癸巳以病歿年五十六九容氏  
又曰吾父清德長人之知喜於晦養母今以嗚呼  
奈何稽曰賢哉金母也文溫公雖無子亦是女以生  
九容氏宅相成遷史傳可不謂賢哉男三人長九容  
前山正大夫三司左尹進賢館直提學知製教文

秋館編修官次齊顏中議大夫中書兵部郎中兼  
書河南江北等處行樞密院事奉善大夫典校副令  
知制誥兼春秋館編修官次九德前左右衛保勝散  
騎女九人適密直副使金士安前開城尹李彰路前  
宗簿令崔有慶前郎將許顯前副令許誼兼博士李  
左斯門下注書金瞻次未適其銘曰  
物歸其根其生不窮驪興閔氏葬于其中江之流乙  
曷其有終與之俱長永嘉之風

雞林府尹謚文敬公安先生墓誌銘并序  
順興安氏自文成公珣以下多達官文成之曾孫政



堂文學元崇生子三人皆登科文成族子及弟謹碩  
隱不仕謹齋先生之父也三子登科而謹齋之子今  
密直公之三子又登科謹齋伯仲皆登中國制科受  
朝命光耀一時文成子孫所不逮也元朝科舉以來  
吾東人父子兄弟相繼而登科者順興安氏與吾韓  
山李氏而已稼亭先生受業於謹齋而銘其墓稱之  
鄉試也先生又為主文稽雖衰病亟不獲讓嗣為銘  
文則於先生敢辭諸先生性豁達喜讀史漢臨官務  
遵天躰略不依違顧望飲酒少然不少醉醉則止為  
文章去羣取實達而已矣 玄陵知其賢將大用罹

密直提學兼監察大夫提調銓選吉進同知乙未同  
知貢舉取安乙器壽三十三人拜啟堂文惠先生自  
謂遇知知無不言久而 上以為闕於事情而先生  
以母老請出於是尹雞林府歲丙申改官制未及召  
先生先生歸養于鄉會疾作歎曰慈顏無恙而季氏  
亾伯氏又亾吾又如此奈何奈何又曰命也可如何  
已而果不起嗚呼悲哉嗚呼悲哉謹齋先生之子今  
密直宰相宗源吾之同年進士也與其妹夫密直宰相  
相鄭良生來曰文敬公年十九歲在庚申中進士科  
許判書其試官也其年又中秀才科蓋齋李文忠石



齊於判書其知貢舉也文敬公天資既美吾先人教  
之又最人皆服文敬質之美而尤重其有賢父兄也  
其初歷官廣州司錄權知典校校勸藝文檢閱春秋  
修撰藝文供奉門下注書監察糾正軍簿佐郎左正  
言右獻納典理立即監察掌令典儀副令典理掖郎  
衛尉尹監察執義右代言兼執義典法判書也館職  
則自提學至大提學也其登中國進士科三酉歲也  
其奉命出使甲申移廣道按廉使乙酉交州道按廉  
使也丁酉九月初四日卒于順興府臣德焉五十六  
歲其卒年也今二十二年矣而墓未誌嗚呼文定之

無後也蓋可悲矣夫人崔氏無子故無所從無所從  
故難於守節而吾等奔走職事又不得專志於其間  
遷延至今嗚呼蓋可悲矣子其銘之將鐫石而納之  
壙中庶其不朽也稽先生之名之傳也何患焉登  
科有錄題名有碑鴈塔流芳散在中國人之見之誰  
不曰高麗安氏兄弟登科因以歆其風於東海之外  
則先生幽堂之石雖未刻焉亦可也矧其行事載於  
國史異日撰玄陵實錄則先生之列傳又足以耀  
耀史冊其傳也愈必矣子獨悲其無後焉雖然近世  
名公善人如南村李侍中愚谷鄭密直及菴閔費成



德行文章蔚為時宗未聞有纖毫過舉况於絕嗣之  
大故乎而皆無後天之有未定也審矣先生之提調  
銓選事也稽嘗執筆隨其後一日夜半召先生入有  
所除授既而上曰今日何日命取歷觀之曰徇鬼  
日也姑止先生嘗惡陰陽拘忌則跪曰王者奉天時  
不在於此願 陛下欲行則行徇鬼何害 上變色  
初先生登科授將仕郎遼陽等處行中書省照磨兼  
承發架閣庫先生曰既受命矣而不供職是不恭也  
况照磨惟在收掌文書而無他務予吾當赴省既上  
官省官重其才皆禮貌之先生曰吾今足以塞吾責

矣母老而不歸養又非孝也於是掛冠而歸予之在  
都也韓仲輔御史言吏部官有知先生者擬進翰林  
國史院編修官省臣却不奏襦之不肖猶且緇踵先  
人供奉翰林先生竟如是信乎其命也夫信乎其命  
也夫先生嘗曰吾既無子門生即吾子也今其門生  
李寶林政堂文學庶國寶李勒禹李寶皆樞密宰相  
奉朝大官又多其他通流以名聞于時而閩浮屠以  
扶吾道者章溪鄭習仁也避仇怨能遁荒野者廣州  
李允洽也得人之盛當世稱之先生名輔字之負之祖  
諱某曾祖某皆本府戶長外祖檢校軍器監文景銘



曰  
嗚呼先生學底于成對策舟楫克振嚴聲相我  
先王周旋廟堂弘敷文化迺闢春場曰我儒生斯為  
至榮毋老不養我心胡平忠孝立揚君子之光嚴或  
不全非癡則狂迺陳其情迺尹月城安則無恙而疾  
是嬰雲徂乎方永矣其傷有德無子云何彼蒼嗚呼  
先生木拱于塋于載之下可傳惟名惟名之彰死猶  
不止于溪有源其流之長

判書朴公墓誌銘并序

宣海朴氏以儒術吏事顯于世者曰典法判書諱元

桂字 當 忠肅王時使臣至自都特息作氣勢  
以奴婢事白于 王將巫人之直而入之已兩造官  
門使臺臣決之判書公時為掌令別白邪正不少撓  
使臣大怒而去 王曰臺臣當如是遂陞執義以賞  
其直當世榮之初公年十九歲在辛丑鄭常侍僖取  
士成均益齋李侍中年十五擢狀元次則公也是年  
菊齋權公溥悅軒趙公簡堂試禮闈公又中焉司錄  
全州燕堂書記境內有虎暴牧使判官捕之不能得  
既而委之公公則部分騎射要於隘一箭中之遂斃  
延祐丙辰權知典校校勘丁巳秋移成均學正其冬



入藝文為檢閱從 忠宣于燕邸執筆在側勤謹無  
過甚見愛重戊午冬移嘉安府丞己未冬授承奉郎  
中門祗候庚申夏轉都官散郎泰定甲子夏以開城  
少尹知寶城郡事有惠政至順壬申秋授通禮門判  
官元統乙亥春拜奉常大夫監察堂令綱紀大振班  
行肅清明年有宮門決事進拜中丞之命至元丁丑  
移宗簿令知製教歲戊寅春判小府寺事階奉順大  
夫宮交閣提學依前知製教選為江陵道存撫使秋  
將代還宰臣謂江陵人便於朴存撫遂馳一介仍齎  
祭留之明年春又如之秋又如之民至于今思公不

置寅辰 忠惠王即位置便民條例推辨都監以公  
為使者二年裁決平 時人稱之忠定初政大用人  
才典選者重法司難其人遂用公進階奉翊大夫館  
職兼寶文閣提學廷中皆曰典法判書得人矣是歲  
公年六十七夏四月十二日得疾二十三日卒某月  
某日葬于童城兩足山馬田谷實至正九年己丑也  
歲乙未正月初二日夫人吳氏年 十 以病卒  
同城而葬夫人豆原人禮賓卿諱誼之女持家教子  
皆有法度生男二人曰寶生官至奉順大夫判衛尉  
寺事曰童生今為奉翊大夫典工判書女一人適檢



校成均大司成金臺卿孫男女若干人衛尉穡之妹  
夫也無子判書先娶孟齋侍中之女生男曰經奉常  
大夫三司副使曰緯與校寺校勘曰秀門別將女在  
室緇室以判宗簿寺事致仕蔡滋之女生一子幼曾  
孫男女若干人副使娶賚成事奇有傑之女生三子  
校勘娶判事李思義之女生二子皆幼外孫男女若  
干人曰可文中顯大夫與校令女適正順大夫判典  
校寺事金禧次適奉善大夫司宰副令鄭漬外曾孫  
若干人與校令娶繕工令權承矩之女生男女云判  
典校無子副令生二男一女皆幼子既成童判書公

往來吾家觀其貌豐厚聽其言慈祥未知其可畏  
稍長聞其為臺臣憲使則知其有紀綱烈丈夫也及  
其凶恨親炙之未久痛老成之無在為日夕矣况  
典工中進士科為時通才揚揚入是府持斧專城所  
至遺愛存焉故其請銘也不必辭而書其世家係之  
以銘曾祖諱得球左僕射祖諱文圭禮賓卿父諱瑄  
中顯大夫典客令外祖通禮門祗候大寧崔壻其銘  
曰 東海之隅我公出焉丹陽之區蜚英通衢事我  
忠宣珥筆燕都烈文 忠肅威臨咫尺決訟宮門析  
白于黑廷擢中丞邦之司直存撫江陵海循山登一



方靜謐非我之能惟久於任風化其承無訟是尚秋  
官之長第竟厥施蔓草黃壤我銘匪私太史攸掌

烏川君謚文貞鄭公墓誌銘并序

近世言大平者必稱 明陵朝蓋 永陵比群小以  
致岳陽之禍 聰陵享國日淺且有崔源反吠之難  
獨 明陵五年朝野清謐士樂民附謂之小康亦不  
過矣嘗是時由郎官參銓選歷四年致位樞密執事  
敬行已簡重蚤有譽於一國者烏川鄭文貞公當為  
稱首 玄陵初例罷相閑居者十又三年日以山水  
自適安焉無外慕 玄陵久乃嘉之封之日城既而

拜密直商議宰相出鎮合浦東北面入相出將望  
重矣今 上方用舊臣而公病作嗚呼公之病也予  
往候之不甚困也數月又往候之則不接客矣及其  
亾也予與上黨韓益雲同往致祭而予以病作不果  
執紼予至今恨之今其子壻請銘其墓嗚呼忍辭諸  
公諱思道字思道幼名良弼既登第有當避則名思  
度事 玄陵始改今名其意蓋曰或處或出無非道  
也鄭氏延日望姓曾祖諱均之贈金紫光祿大夫門  
下侍郎平章事祖諱澗奉善大夫獻部議郎知制誥  
考諱侑中顯大夫宗簿令妣蔡氏封慶原郡夫人奉



常大夫獻部議郎惟吉之女也以延祐戊午十一月  
乙卯生公幼知讀書稍長為詩有豪氣有名儕輩間  
年十九順天君蔡公洪塔延平君安公規同掌試公  
一舉中之後至元丙子也至正辛巳春權知典校校  
勘俄遷注簿復為郎冬去之為堂後官以勞授奉  
郎監察糾正八仕十閱月而拜叅官亦卒矣歲甲申  
明陵即位由糾正超授軍簿佐即明年春陞正郎夏  
移典理元十八日遷至憲善大夫成均司藝冬十一  
月擢密直司正副代言軍簿提即藝文館直提學知  
製教充春秋館編修官階仍奉常由佐郎歷一歲而

拜等宣之命亦甚罕矣明年陞左副代言典理提郎  
又陞右代言知軍簿六月進右司議大夫階中正大  
夫其冬進階正順大夫右代言同知春秋館事又明  
年試士成均取令知密直朴形等九十二人時稱得  
士夏進知申事知典理秋拜奉翊大夫典理判書館  
職如故俄而明陵將大用公命公直提學於密直  
司自始拜代言元廿二月而入兩府公年才三十矣  
然而士論不以為大蚤其得時譽可知己歲丙申母  
歿廬墓終制歲癸卯玄陵曰鄭某忠於所事孝又  
如此予甚嘉之封日城君自後九有禱于上下必命



公取其正直也秋拜密直副使商議大寶文同知春  
秋館明年春尹漢陽府秋以同知密直召還俄封君  
出鎮合浦軍機民務兩得其宜一道便之會鷺城欲  
抵令判三司崔瑩死罪使其黨李得霖往鞠之公死  
執不可得霖許于鷺城鷺城白于上罷鎮歲丁未  
簽書密直歲辛亥進知司明年賜端誠翊贊功臣之  
號又明年以密直行安邊府事鎮東北面其名曰上  
元帥曰都巡問使軍民之任叢于一身處之有其道  
人至于今稱之歲癸丑改功臣端誠曰忠勤其冬以  
本官商議會議都監事今上即位進匡靖大夫知間

下省事未幾拜政堂文學知書進事館職並如故明  
年改評理商議俄封日城君俄改烏川君大進賢加  
賜功臣號曰忠勤節義翊贊歲戊午公之甲子周而  
復始矣名節無少虧矣而病之作也天也歲己未九  
月十五日卒于第享年六十二官庠葬事十一月庚  
申日窆于栗村之原嗚呼君子而未得其壽者多矣  
壽矣而才踰耳順天之靳人也甚矣公允再娶裴氏  
少尹諱玄甫之女生二女長適典法摠郎李容次適  
司憲持平安景恭鄭氏左司議大夫諱誦之女生一  
男曰洪典校副令孫男女若干人摠即無子持平生



一男曰金經副令生一男二女皆幼銘曰  
文貞之賢文武俱全致身兩府餘三十年歷事四朝  
長也清標儉而非固豪而非驕美哉文貞宜得其名  
千載之下尚徵斯銘

唐城府院君洪康敬公墓誌銘

南陽洪氏三韓名家世為大官而是不出境其顯于  
中國則或有反吠者焉至於仕中國以名節稱仕本  
國位冢宰功在社稷者康敬公一人而已公諱彬字  
文野其先世入居燕公生于至元戊子父母絕愛之  
稍長宿衛 內庭積其勞皇慶壬子用長官薦授從

事郎大都路霸州同知以監折草功

拘再轉抄紙房提領階承務郎幹事之才為人所  
服天曆己巳奏授承直郎松江府判官吏不敢欺以  
都水監經歷召還陞承德郎都水之政不少撓又轉  
奉訓大夫太常禮儀院經歷未幾丁外艱

忠肅王被讒留京師者五年公於是多為 王出死  
力訟 王之屈而別白之及其復爵從之東歸寧後  
至元丁丑也 王念公功為將留之佐故馳請于  
朝授公征東省理問所官又曰詞訟不足以煩公盍  
以國事委之遂拜都僉議贊成事階重大匡帶上護



軍俄而進判軍簿司事人之稱之則曰二相已卯春  
三月 忠肅王禮陟遺命權征東省事秋八月政丞  
曹頤陰右潘王將廢 忠惠王以誅君側小人為名  
率百官擁永安宮 忠肅王公主之所居也頤既脅  
百官矣惟憚公百計勸公且告其謀公曰若是則失  
之又甚矣從其見不道有弟在潘王何與焉拒之益  
堅頤雖脅百官疏王罪公竟止使者不得行 忠惠  
王驍勇善騎射率精銳十數人突出潰圍馳呼於道  
曰逆賊頤也餘人為所脅耳予悉知之無恐既誅頤  
則又呼曰老賊伏辜矣餘人安心焉 忠惠王雖在

圍中知公守義又知公沮撓迪謀其德之及 王越  
京有 昔中書省樞密院御史臺宗正府翰林院雜  
訊之 忠惠王不能自明事殆矣公曰頤王之奴也  
奴而欲戕其主王法之所不赦也且挺刃既接誰復  
可迪斯須活我則王之罪當從末減彬以 先王遺  
命權行省事事之于于邦憲彬實當之王不當坐辭  
氣慷慨知公者皆為公危之公曰吾王之子吾不直  
之吾何以見先王地下乎 王既復爵歸國賜鈇券  
功一等進三重大匡封唐城君開府且曰允所以事  
天子行省實主之左右司非其人事或慢且失禮責



之何及於是薦公為郎中階朝散大夫 明陵嗣位  
有許政者中原人也誣公言斥乘輿蔡攸丞為之證  
事聞中書省省長官奏鞠之二人言卒抵牾反抵罪  
公曰吾不可久於此遂如京知公者皆喜曰文野來  
矣薦之朝將顯擢公又求出於是摠管興國路階正  
議大夫公莅民以息御史以法至今遺愛存焉歲辛  
卯 玄陵即位錄功臣若曰洪彬自始至子全甚忠  
於我且見在 先王大臣無如彬者宜宅右揆以輔  
予理於是賜功臣號推誠翊戴同德協義輔理十字  
階壁上三韓三重大匡判典理司事封唐城府院君

蓋古者丞相封侯之典寵異大臣之極也至正癸巳  
冬十二月十七日以病卒于第年六十六訃聞  
上哀悼命重賻賜謚曰康敬公官庀葬事以明年三  
月初八日葬于城南公之哀榮可謂無憾矣曾祖諱  
冲本國贈銀青光祿大夫樞密院副使上將軍祖諱  
世贈三重大匡都僉議政丞判典理司事上護軍考  
諱允深贈推誠翊戴佐理功臣南陽君有元授通議  
大夫集賢直學士妣金氏封燉煌郡夫人正議大夫  
判繕工寺事諱祉之女也娶高氏封燉煌郡夫人中  
奉大夫禮部尚書克仁之女生一男曰壽山緬室以



通儀君玉珩之女敬和翁主王氏無所出壽山仕元  
朝累轉內藏庫副使高州同知秘書郎中尚經歷陸  
運提舉官至奉訓大夫本國奉常大夫通禮門副使  
孫男女各一人貴令為奉善大夫興威衛保勝護軍  
女適中議大夫左右衛保勝將軍白紉曾孫曰康幼  
白氏二人皆幼公之教提舉也浙東却仲淵先生館  
于公予先君稼亭公佐幕東省於公為同寮又相善  
也是以予得同受業焉日且晚將歸公輒留之動踰  
旬月公之食我館我其恩又深矣嗚呼銘其忍辭諸  
公之道德故事載在國史金滕石室人罕得窺則撰

為家傳播之聲詩此吾責也况提舉請之厓乎至於  
持家嚴遇事果斷臨難守節不可奪雖古烈丈夫無  
以過之嗚呼公可謂剛明之至矣公之身老矣而天  
下始亂公之心可知已其強毅果敢之氣將鬱結於  
九原之下而已耶將如麟如鳳以俟大平而出邪吾  
今不得而知之矣嗚呼銘其忍辭諸銘曰

嗚呼洪公宿衛中官長迺擢用才出於衆惟江之南  
再聘我駮所居稱職人懷其德 毅陵惟昔群小轢  
凌公憎于懷如炭于冰奸夫抵隙 永陵之阨惟公  
之吉惟公之掖 先王曰嘻予以之時知公之忠念



茲在茲爰立作相百寮是長保奭是師惟德之尚嗚呼洪公爵祿則豐子孫無幾誰卹其窮誰卹其窮嗚呼洪公

尹母崔夫人墓誌并序

栗亭尹文貞公為其子今三司副使龜生擇婦聞夫人賢執女工豐寒盛暑不輟而又勉其弟母墜家聲文貞曰是足以配吾子矣以禮聘之既至事尊舅盡婦職嫁其弟撫其女如已出族屬或飢寒夫人衣食之而自甘菜色文貞之祖先墳墓在錦者七所三司歲時拜掃夫人力貧治奠物如式仁親敬先蓋天性

云夫人長子曰紹宗吾門生乙巳科壯元也今為典儀副令藝文應教文貞之老子錦也每見夫人曰吾孝婦吾孝婦我家出壯元矣及文貞卒葬夫人過哀盡喪禮洪武辛酉冬十月壬戌以病歿年六十五壬寅葬于錦之南山文貞之塋之右朝之士大夫哭以詩相其挽者相續走其弟成均博士會宗請銘會宗齊衰犯霜雪予哀之不忍辭乃書其家世子孫而系以銘夫人崔氏孤竹郡人經德齋生諱峙其曾祖也三別抄之叛逃難漁中不污禮賓丞同正諱臣牧其祖也隱不仕人目之曰處士進士諱英粹其父也有



詩名早歿朱溪事宦官雙阜監務裴君諱宗衍其外  
祖也廩平字民孫男女若干人典儀娶右尹姜昌壽  
之女生一女緇室以判書朴瓊之女生一男曰匯博  
士娶判事鄭仁彥之女生二男曰江曰河皆幼銘曰  
為女執德為婦蹈則為母有儀其儀不惑宜有其子  
榮以祿食生事文貞死截其側山密水長實惟玄宅  
庶其勿訛保茲石刻

牧隱文集卷之十九

牧隱文集卷之二十

宋氏傳

宋氏出家名性聰然不居僧房在長安傘橋南近  
水樓二間貯書邀客日嘯詠其中得錢即沽酒而殺  
膳不火吝又能畫山水人物亦不甚俗性坦率事或  
抵牾必變色言脫于口駟不及其為詩章不拘聲律  
耳得即吐出或驚人或滿座大笑不以為喜怒乃曰  
偶耳得好句非吾有意於好也偶爾得拙語非吾有  
意於拙也吾之心適然而然耳居家生產亦類此終  
身不謀利口不談市價手不知執筭板蓋於古人亦



未見其匹也喜讀孟子書至不孝無後為大者有所感乃去其教而冠其顛嘗一赴塲屋文字不蹈繩墨雖有竒趣不可羈束然不類他作是以有司不取宋氏亦自知也故不怨有司其後予游燕數年而歸則宋氏已矣嗚呼悲哉予年十四歲學詩時從宋氏游宋氏教予吟詠每曰可是歲松亭金先生試士成均宋氏勸予舉先君在燕都大夫人又少予聞吾欲赴試曰汝必晏也汝之學必不合赴試汝必晏也不然則人必誑汝爾不給紙扎宋氏自市紙扎勸益力予不獲已既試偶中大夫夫人喜曰汝今如此吾疑釋

矣予因自念僥倖而得爾非吾實有才也學不可以不力於是立志于學辛而不中道而廢至于今日詩書之力也宋氏之力也宋氏戊午生長予十一歲使其壽也面見吾出處必喜而不能寐使死者有知當自負前知之明矣予故傳其事庶後之人當取法焉韓山子韓山子乃宋氏鑄也故曰仲尼鑄顏回或曰宋氏誠有功於予然仲尼之說無乃大不類乎余曰以意逆之而已詩人之言是微我娶某氏女生一女適靈光郡人前別將曹敬脩有妹二人一適李氏生郎將義某職天景一適某氏生一子無目善鼓琴名



允明提通門侍衛護軍

吳全傳

大學生吳全長身微偃善書能文庚辰進士也一日途遇座主金政堂政堂面叱曰余不讀書而馳走如此何欵全以手叩懷中書冊默然而去時年十五六歲也稍長補成均生能以禮自檢人人皆自以為莫能及前輩老儒延譽稍廣不幸短命死矣悲夫全讀書三角山僧舍人有薦亡齋呈疏於香卓會僧中無識字者衆髮汗出莫知所為全曰是不難吾為汝讀之乃被僧衣髻其髮於頂蒙之以其冠群立於衆髮

佯為施主曰吾病頭風不可出然飽施主飯而不與法席吾罪大矣衣冠之異於衆其罪小請施主無怪既梵唄施主捧香爐長跪不敢動全起於群中若將去其冠者施主遽曰請比立無去冠全佯應曰諾會既罷施主去矣群髮大噉聲震山谷至今傳為山中故事今天台判事懶菴元公愛與維掖解全亦在其中未久病歿縫掖之結契者出錢以賻之有曰李穎者全之外兄弟也亦能書安常軒先生以女妻之且教之擢第拜正言遷禮部員外郎其後隱不出未知其所終也興國寺南有峰突然其東崖則吳李所家



也嘗記夜雨同床而卧今思之恍如前世事也誠恨其無傳馬略書之以待知君之評者語曰苗而不秀秀而不實嗚呼悲夫嗚呼悲夫

朴氏傳

快軒金文正公以文章道德相

忠烈 忠宣 忠肅 夾國疑如著龜贊邦教為柱石而家政益嚴諸子登科伯氏早亡仲氏鈍軒叔氏松堂皆位宰相世其家壻安氏朴氏安氏政堂文學朴氏密直代言皆以文科顯為士者則安氏之孫三子登科朴氏子亦三子登科而曰少陽字仲剛者朴氏

子也於次為三雖中成均試屢舉不第予悲之故傳其事仲剛性高潔不喜章句之學平居不讀書不習舉業然視已得者蔑如也故科興必入場屋携帙筆燈燭不挾尺書談笑成章不問巧拙投之而出卒無成嘗自念大丈夫鬱之荒陬無乃并底蛙乎去而西游京師縱觀山川人物宮闕城邑其博達之觀踈蕩之氣已非前日而愜所望矣西夏幹克莊治書公一見愛之館之于其家厚遇之時教以詩書仲剛亦不留意久而能北音出與塗人語途人不知仲剛之為東人也頗自喜有志仕宦無先之者會姻親有為山



南廡訪司知事者仲剛從之遊山南補其司羨差嘗  
持捷書一至京師是歲予叨中會試旅邸相見傾倒  
數日而去蓋自是無復見矣嗚呼仲剛其存耶其亡  
耶無由而知矣吾使者連歲入覲建康無一人聞其  
音耗者何欤豈處遠而京師無親故欤豈流離民伍  
蓋與鄉人見欤豈已為古人而不可作欤何八九年  
之久行李之往來又非一再而無聞之若是欤予於  
仲剛無竹馬之舊識其面於京師松亭先生實吾座  
主也座主之甥不可以泛交也是以同食馬而仲剛  
不敢不飽同袍馬而仲剛不敢不衣人視仲剛詭恠

也而我則待以謹厚人視仲剛放蕩也而我則繩之  
以法度是以仲剛亦不敢以泛交交我也快軒公之  
子孫誠可謂盛於一時矣而仲剛游中原竟不歸後  
之人將不知仲剛為人之如何也是仲剛泯焉無傳  
矣况無子乎予悲之甚略書大槩以俟知者仲剛如  
立功中原書諸史氏曰高麗朴氏也父曰某母某氏  
則吾此傳不傳可也如或不然當使朴氏子孫之作  
譜者有考焉

草溪鄭顯叔傳

草溪有隱君子鄭上舍者我先人稼亭公同年進士



也有子曰習仁字顯叔穡之識其面久矣而未嘗接  
殷勤之歡不知其為上舍子顯叔亦不以為言顯叔  
有志氣有文華使酒敢言同列憚之乙未春益山李  
侍中竹溪安政堂典貢舉顯叔對策高中掌教成均  
用其勞入叅官不說隨不苟合搢紳皆願內交而顯  
叔視之蔑如也被選出知榮州將視事吏以故事請  
詣消灾圖焚香顯叔曰人臣不蹈非彞灾也從何而  
生若其無妄君子順受之而已矣疾病之未作也吾  
調燮焉而已矣既作也吾藥餌焉而已矣將死也臆  
腑必有先受者而不可救矣消灾圖於我何哉教吏

撤去或曰以之為禱坐卧之傳者之過也州有塔顯  
叔訊其名吏以無信告顯叔曰信乎吏曰敢無稽顯  
叔詢諸士大夫老而家居者皆曰然顯叔曰異哉惡  
木不息也益泉不飲也夫何故惡其名也烏有巍然  
其形為一邑所瞻視而以無信表之者乎去粟入無  
以自生也去兵入無以自衛也然且去粟與兵如棄  
弊筵然而不敢去信吾夫子已言之又較州吏刻日  
夷之用其軓以修賓館焉會病用大臣後弗甚發置  
顯叔死地廷臣憐其志多為顯叔白  
上者乃得免於是顯叔名益重矣柄用者既誅起顯



蘇知梁州又知密城所至抑強扶弱威惠並著禁淫  
祠擊其巫覡顯叔之常事也故略之其入為都官郎  
也不祭土地又欲去消災圖慶早不果顯叔母歿廬  
墓三年父歿亦如之悲哀之至人多稱之忠臣出孝  
子門信矣今

上嗣政急於救賢宰相素重顯叔名奏授典校令即  
秘書監也賜三品服榮遇矣而有日本之行知顯叔  
者皆為顯叔危之其子今年進士壯元號泣于天人  
哀之不忍聞也顯叔怡然義形于色曰生而必死何  
擇地二臣而有君何避事焉且吾志在立功雖異域

不憚也矧東方號為君子不死之國也我矧今兩國  
之好始通雖然相接也我雖然梗乎其間者猶未絕  
也吾之行也必將使盛盍而享焉耳若夫棄擇之意  
採藥之跡雲皇雄紀之典當為諸公詳之於是諸公  
競為歌詩將以遺之野次繕以世文之故不且默而  
方以李浩然所言為據譔次之浩然洞儻士也言不  
妄又曰顯叔之守墓以父好佛日讀佛書遂成誦又  
而不忘孝子之不忍死其親如此一日出訪友人其  
家適齋僧之誦經數部顯叔在傍誦如流僧意必信  
士也問姓名顯叔即應曰壞塔鄭某也一座大笑君



子服其強記云日本使問顯叔之為人於館伴館伴以實告曰本使佛者也畏其剛烈乃曰作佛者吾律所不與請易之於是不果行

崔氏傳

辛巳十韻科崔霖父諱成固郎將母薛氏某官某之女霖嗜酒吟詩好游僧房非沽酒者去之有寒溪釋甚相得淋漓相從禮法之士頗短之猶以才高故稍貌敬焉癸巳秋鄉試僕幸獲與崔氏聯中及會試中書堂崔氏眼疾作艱於書字乃歎曰吾所得僥倖也今才高於予者二人焉屈二人而必得之非吾所

望也眼之如此必天也吾將寄舉焉乃不赴試既還國遷至兵部員外郎歲丙申奉表賀明年正于京師既訖事還至遼河遇賊使副三節人吏皆被害嗚呼悲哉蘄州秦中吉吾先君少相善也博學能文從之受業者多高科顯仕而秦公老矣猶欲出游場屋先君知丁亥貢舉秦公曰吾與稼亭東髮同學雖幸而獲中人必謂稼亭私我也由我而得是名是我累吾稼亭也可乎執乃不赴歷官五品立子班心矣退而與諸生講論經史無少倦崔氏其外甥也其文章又非秦氏所可及而宦不達不幸而止嗚呼崔氏之禍



歟秦氏之禍歟秦氏壽而崔氏夭若其名也崔氏也  
秦氏也皆可傳也庶可以自慰於九原矣崔氏僮  
敢言使其不死益進其文辭當不讓拙翁矣居官未  
久志未效為文少才不養精氣散於遼天射魄蔽於  
遼野當鶴言華表而表歸也千載之下讀崔氏傳而  
又聞其言也豈不悲哉予以是略書大槩以為崔氏  
傳云

### 白氏傳

白氏名璘西林人予少友也先稼亭公知丁亥貢舉  
白氏擢乙科是同門也西林與吾韓山地犬牙相入

兩家密邇總角交游讀書崇政寺中是同學也今天  
台懶殘子喜與維掖游又能讀東坡詩維掖群進而  
聽其說日滿座其中豪傑者結契以示信白氏實紀  
綱之是同志也不可言不知白氏矣知其人而不使  
其傳非仁人之心也考諱咸正從宦內侍群居必蹈  
禮諸院長少有違法或以褻語相燒必怫然却立曰  
吾父名吾曰咸正而可少有偏倚乎諸院長久而歎  
服官至通禮門舍人妣金氏尚州人庫使諱仁通之  
女也白氏一弟曰紹由都評議司使知印歷都官正  
郎公為某官以能稱白氏娶某官奇諱軻之女生一



女適某官某再娶某官鄭某之女無子白氏聰明強  
記蓋近世無比焉予與白氏同在見州僧舍一日相  
約背誦所讀書白氏未午而畢僕至昏乃成誦既踰  
年同在西林僧舍夜卧無燈以口下象棋明日覆之  
白氏不錯一路僕兩處疊下如此之類頗多今不悉  
書然此亦足以知白氏矣白氏能食一飯兼數人亦  
不甚飽又有力雖自負驍勇者不敢敵其為文辭有  
氣如長虹勢不能自已其筆跡亦不甚俗嘗書祖母  
幽堂銘先人必有所取去乙未秋予供職翰林明年  
將歸共話一夜白氏羈蹤艱甚而志不少衰蓋於功

名有志者也卒無所立而藁葬于燕吁痛哉

鄭氏家傳

鄭氏西原大姓也譜所載者曰別將諱克卿別將生  
贈中郎將孝聞中郎將生朝議大夫神虎衛大將軍  
顛初名俊儒大將軍娶金吾衛散員赤城白利臣之  
女生監察御史贈尚書右僕射僕射娶綏陵直平  
州韓暉之女生都兪議贊成事謹章敬公曰堦章敬  
娶平章事扶寧金公諱址之女生滑河君曰憤判典  
校寺事曰怡緇室以中贊致仕謚匡定洪公諱奎之  
女生二女適代言慶斯萬宗簿令崔廣清河娶判三



司事上洛君金公諱珣之女都兪議中贊陽川許文  
敬諱珙之外孫生雪軒先生曰頽雪谷先生曰誦典  
校娶某官某之女生一女適判事郭琛慶氏生今侍  
中公名復興崔氏生判開城名孟孫雪軒娶某官某  
之女生縣正尹次旋軫今為兩街大師曹溪宗演福  
寺住持次暉丁酉及第今判典校女適萬六順興君  
玉昇三司右尹權鑄前糾正柳廷顯雪谷娶兪議參  
理春軒崔先生諱文度之女生和安陵直早亡次衍  
改樞字公權今以字行簽書密直司事辭住家居女  
適政堂文學允松壽政堂文學鄭思道護軍李仁富

允氏女長適三司左尹許錦次適糾正金若采鄭氏  
男曰洪丁巳及第禮儀正郎李氏三男曰樸實郎將  
曰剛實丁巳進士神虎衛參軍堅實求仕簽書娶知  
都簽議韓公諱大淳之女生男曰穆丙辰科壯允及  
弟左正言次曰拯曰擢女適內府令李贊鄭氏之先  
毓慶流社大將軍死事之績紀于盟府載在祀典而  
章敬公功業之盛勳為之宗其致子孫之多賢也宜  
我大將軍以臺掾分司西京會成州人崔光琦棄遼  
孽金始之亂殺西京兵馬使崔愈恭據其城署置僚  
佐募精銳聲言興復高句麗傳檄相煽實我高王



四年丁丑也大將軍慶雖早大怒袖斧率昱玄甫申  
竹茅十餘人往擊光秀果一斧斫之誅其黨八十人  
餘置不問及側逐安高王大喜超授中郎將仍令  
彖直內侍院賜衣冠鞍馬賞從佐右差歷將軍侍郎  
拜大將軍遷都江華之明年畢玄甫以西京叛大臣  
議招安以玄甫嘗為顛用即舉顛馳傳宣諭既至大  
同江從者請無遷入顛奮然曰受命以出敢少稽乎  
死固分也既見玄甫玄甫喜於得大將軍欲以大將  
軍為主且誘且脅大將軍竟不屈遇害國家褒崇先  
代功臣大將軍必與焉御史不食舊德而子章敬公

幼孤發憤工文章 尤五辛未年十八中司馬試明  
年及第又明年入秘書省尋改通文院錄事大官丞  
累遷文翰署史館辛巳擢右正言知制誥公年二十  
八矣是歲從 忠烈王幸合浦征日本也癸未遷左  
補諫冬移軍器少尹乙酉轉軍簿正郎丙戌待制寶  
文署丁亥少尹秘書秋七月從 上北上加朝顯大  
夫軍器尹冬授郎軍簿司兼典牧副使戊子以前官  
兼春官侍讀俄充史館修撰官冬轉典理摠郎文翰  
侍讀學士庚寅擢密直司右副承旨右司議大夫世  
子右諭善壬辰進右承旨掌試南省取政堂李彥冲



等六十二人甲午陞知申事元貞乙未秋七月拜奉  
翊大夫副知密直司事判秘書寺事移國學大司成  
丙申春改版圖判書冬同知密直司事無世子允賓  
戊戌秋進知司兵曹判書八月奉表入賀 聖節  
成宗見之有使乎之稱庚子以密直使判書典理其  
冬判三司事辛丑知都僉議司事甲辰春參理僉議  
司乙巳進資成事延英殿大司學同修史四月知貢  
舉取張子贊等三十三人時稱得士韓政丞宗愈金  
政丞永晫皆公門人也是歲六月初五日舊疾作及  
晚蕭然而卒遺命薄葬癸年五十二章敬公美風儀鬚

髯如畫平居坦蕩遇事則精悍不可撓蓋剛於口者  
也王惟紹宋邦英特恩誤 忠烈王將廢 忠宣王  
而立瑞興侯璵表請於 天子矣公憤其所為未得  
發一日遇宋於塗省宰院宰相遇自有禮邦英驕將  
揖於馬上公佯為不見徐下馬禮畢謂其唱道者曰  
汝職也胡為而廢之我使從者捧其胡而批其頰邦  
英慚靦而去斯非剛也欽公自入仕常與銓選凡所  
升黜皆歸衆之譽受宣命為征東省郎中清河性豁  
達無檢束不事家人生產夫人金氏之祖忠烈公每  
稱之曰憤真男子也必以門功累補西大慈院錄事



北面都監判官與威衛參軍事別將大德八年授興  
威衛保勝護軍階朝頭大夫明年秋遷版圖摠郎冬  
出副東京留守十二月加禮賓尹大德丁未牧忠州  
政嚴明吏不敢犯延祐己未復親禦軍大護軍中頭  
大夫至治間 忠肅王被讒留京師者五年藩王  
勢日熾臣下之守義者二三而反吠以篋倖者皆是  
也清河時為宮闈都監使聞 王帑已罄乃以都監  
舊費之無名者化為輕齎輸之燕邸 忠肅甚嘉之  
既復政即授奮揚軍上護軍尋以通憲判繕工會別  
作封清河君閑居以頤養盡喪其清而答其勞也卒

年五十五雪軒字思謙延祐丁巳科及第歷官至僉  
議評理階重大匡賜推忠陳義輔理功臣之號謚文  
克公嘗受 宣命提舉征東儒學蓋 忠肅王命傳  
玄陵以是為 玄陵所重雪谷字仲孚泰定丙寅年  
十八連中進士科及第科喜從雞林崔拙翁游得其  
語法故其詩文無俗氣歷備巡衛參軍典儀直長至  
元丁丑入藝文為修撰奉表如京師會 忠肅王東  
還上謂瀋陽道左 忠肅一見愛之留以自從戊寅  
驟加秩左思補知製教成均司藝之文應教知製教  
兼春秋館編修官己卯正月 忠肅薨辛巳 忠惠




王左轉典理摠郎是夏拜中顯大夫左司儀大夫藝  
文館直提學知製教秋進階中正司議古諫大夫也  
多所封駁執政惡之既視職家居或諧諸 王曰恐  
鄭氏兄弟走上國文輔 太弟於是命下逐兄弟文  
克赴寧海雪谷赴尉州雪谷雖在謫中吟嘯自若今  
其集中詩語可見煦民以愛待吏以嚴到于今稱誦  
焉歲甲申游燕丞相別音昔化公大愛之將薦之  
天子不幸遘疾乙酉秋七月十四日歿于旅舍簽書  
時年十三奉柩以歸吾先人稼亭公哭之其詩有多  
慮傷神之句蓋是時同在客中頃刻不相離必有所

見而云然筆蹟為一時之妙吾家鼻風所書八疊辛  
丑冬棄之而去惜哉夫人早寡教子嚴年將七十而  
愈康強簽書少多病比壯稍通方藥能却邪補正年  
將五十而神彩秀發豈造物者哀雪谷之不幸而厚  
之於簽書也邪簽書與予同年及第又嘗同為諫官  
義不可辭略為撰次以送史官云

牧隱文藁卷之二十終



This image shows a page from an old ledger or account book. The page is cream-colored and features a grid of columns and rows, typical of a ledger layout. The grid is defined by dark ink lines. There are approximately 10 columns and several rows. The page is mostly blank, with some faint, illegible markings and a small, faint mark in the center of one of the columns. The page is bound on the right side, as indicated by the gutter of the book.



